

Baraen Douk Jisas Krais Nakrip Jon-enyi

Banenyi Baraen Um Enenyenen Jisas Krais Neyabig Jon Um

- 1:1-8 Jon kabi nanabek yomnis um aria natik eneshenesh eshudok aria nowem enyudok baraen 7-poreis awiros um Iruhin ananish arpesh aria natuk Jisas Krais ananin nyeigur nyato iruhw.
- 1:9-3:22 Jon natik Jisas Krais natrugun abom aria ananin baraen nyanam eshesh sabaishi Kristen shape 7-poreirub warub iri.
- 4:1-8:1 Jon natik iruhw heven aria natik Jisas Krais nani ananin Yaken Iruhin, hani sabaishi enselahos aria natik Jisas nakweshih 7-poreis kendelis gris douk soweshik apudok shup douk shadareshap iri.
- 8:2-11:19 Jon natik 7-poreish enselahos atin atin shasuhw aruruh aria shahaprisharuh
- 12:1-13:18 Satan ta nini Iruhin ananish sabaishi enselahos shurpak aria shuhiyahan nugruki agundok atap
- 14:1-15:8 Jon natik Jisas natogur kabi douk nugaen sipsip um aria nani bishatin enselahos shabo eshudok arpesh douk shakon agabus abom Iruhin iri
- 16:1-21 Jon natik enesh kupaishi 7-poreish enselahos. Eshesh atin atin shasuhw marus.
- 17:1-19:21 Iruhin ta nuwanamesh yoweishi inahos eshudok arpesh shape wabur Babilon shenekesh iri, aria Krais ta nutogur kabi douk arman netem shigorihwinyi hos um aria nunaki.
- 20:1-15 Satan ta nunuweshik nupeik namudok agudok gagari nuwag gabuh gani atap iri nuwag aria Iruhin ta nunek skelimaguk ihishmorim arpesh ba iyoh
- 21:1-27 Namuburi wabur Jerusalem
- 22:1-6 Worubibar abar bani shuruwepigos rowos douk ta arpesh shishoh aria shupe wosik abom ihih nyumneh iri.
- 22:7-21 Jisas Krais ananin nyatuh iri baraen douk nahwar sabaishi arpesh um shunakumori anan.
-

Baraen Jon Nenyem Nyakri Um Okwudok Buk Iri

1 ¹Seiwok enyudok baraen um Jisas Krai nyanabeshuk. Aria douk abudok nyutob enyen nyatogur yopugunum. Iruhin douk nakon enyudok baraen Jisas um nukrip shenek Iruhin ananin mour iri um nuyabigesh um shanabeshuk iri eshudok eneshenesh hurukatin um shutogur. Anan douk neyabigap namudok. Anan neshopoki ananin ensel nyanakumori eik Jon douk yenek Iruhin ananin mour iri aria nyakripe enyudok baraen. ²Aria eik yatik eshudok ihishmorim eneshenesh jurug aria eik yawereh enyudok baraen yakripep yopugunum. Enyudok baraen douk Iruhin ananin nyani enyudok adurin baraen Jisas Krai nakripepenyi. ³Enyudok baraen nyetem okwudok buk iri douk nyakrium eshudok douk ta shutograri iri. Aria ihishmorim arpesh douk shutariri enyudok baraen debeg um kupaishi shumneken iri, eshesh wosik shanadudareh. Aria eshudok douk shumneken aria shusuhwen dodog shugipeshen iri eshesh shopunek douk shanadudareh. Um maresh? Abudok nyutob um eshudok ihishmorim shutogurum douk banaki hurukatin.

Baraen Jon Nenyem Nyunam Iruhin Ananish Arpesh Shape 7-poreirub Warub Iri

⁴⁻⁵O ipak Iruhin ananishi arpesh pape arbudok 7-poreirub warub douk bape shokugi nahobig Esia iri. Eik Jon yenekumepogu apudok shup ipak. Eik yakri Iruhin douk seiwok nape, aria kweipon shopunek ta nupe arigaha hugiguk iri nyumnah hutograri nutaurumep meyoh. Aria anan nutaurumep pupe dodogowip aria ipakiruh aparuh hur wosik. Aria shopunek, yakri eshudok 7-poreish yopishi mishish^a douk shape hurukatin um Iruhin ananin debeinyi wagitur iri shuni Jisas Krai shopunek shutaurumep meyoh aria ipakiruh aparuh hur wosik. Jisas Krai douk neyotu dodogowin atun nagipesh ananin baraen wosik iri nakripep ihinymorim Iruhin ananin adurin atinyi yopinyi abom baraen. Aria sagomatin Iruhin narik nohur anan nakutukuk wonugwehw aria watak nakitak nape. Aria anan douk abom nape debeini um ihm-morim debeimi king douk hape agundok atap iri.

Anan douk urkum manawashamap aria ananibor owishibor botourak babuh aria bokweshihap aria mape wosik um eneshenesh apakish yoweishi inahos. ⁶Aria douk anan nenekap mape debeipi um sabaishi arpesh kabi douk king-omi um. Aria shopunek, anan nenekap mape pris kabi amam seiwok hape henek ofa um eneshenesh eshudok hako Iruhin iri um. Aria apak munek mour um Iruhin douk Jisas Krai nenek lotuman

^a 1:4-5 Enesh shakri eshudok 7-poreish yopishi mishish douk shakri um Iruhin ananin Mishin.

iri. Aria anan shopunek douk ananin Yain. Aria eik yakri debeinyi nyeigur nyuni ihinyumorim dodog abom shupeum anan atun ihih nyumneh! Adur atin.

⁷Ipak tik! Anan ta nini orug nunaki. Aria ihishmorim arpesh shuni eshudok douk seiwok shan nagok iri ta shutrun esheshis nabes. Aria ihismorim debeisi awirosish arpesh douk shape agundok atap iri ta shurepan abom. Adur atin eshudok ta shutogur namudok atin. Adur atin.

⁸Aria debeini dodogowini abom Iruhin douk seiwok nape, aria douk shopunek nape, aria kweipon ta nunaki iri nakri namudok, “Seiwok baugos um ihishmorim eneshenesh eshudok watak enesh shupe uwe aria eik yarig yape. Aria kweipon shopunek, abudok nyutob ihishmorim eshudok shunak shutuhuk um eik ta ipe.”

Jon Natik Kraiss Douk Iruhin Nagraehan Neshopokan Nanaki Iri

⁹Eik ipakin ashuken Jon douk yani ipak munoprom Jisas atun iri. Eik douk yani ipak memnek eriger aria meyotu dodogowip um musah enenyenen amaen douk ta nyutogrupap iri. Aria douk shopunek, eik ta ini ipak um muwish agundok Iruhin nape Debeini um ananish arpesh um. Eik douk yakripesh Iruhin ananin baraen nyani enyudok adurin atinyi baraen um Jisas. Douk namudok aria eshesh shasuhwe sharawe shanaki sheyosop yapeik enyudok unai nyeigurinyum Patmos iri. ¹⁰Anah nyumnah douk apak apa mape munek lotu um Debeini ahi, Iruhin ananin Mishin nyatogrume dodogowin atin aria nyeyabige eshudok yatrish kabi yabo yomnis yatrish um. Aria yemnek anah debeihi mah agabiwe um kabi douk shahapur oruhw um. ¹¹Aria enyudok arpen nyeyagwrehi iri nyakripe nyakri, “Nyak wem eshudok douk ta nyutrish iri anap shup aria nyukeshop punak um Iruhin ananish arpesh shape arbudok 7-poreirub warub iri. Nyeiguhwirub um warub douk arbudok. Efesus, Smerna, Pergamum, Taiataira, Sardis buni Filadelfia iri Laodisia.”

¹²Aria eik yatanam um itik enyudok douk nyakripe enyudok baraen iri aria yatik 7-poreish eshudok shenekesh gol iri shatao. Eshesh douk shenekesh um showem lamhos shetem um. ¹³Aria anan arman neyotu orokohun um eshudok 7-poreish shenekesh gol iri. Anan nor anah rouhi rupah habuh heyawiamokuk ananiruh yeriweruh aria nawashak anat let douk shenekat gol iri um ananin mishin. Anan douk kabi Anudok Arman douk natogur adurinyi arpen iri um. ¹⁴Aria ananig barag douk gatogur shigorihwig abom kabi ehirub douk batogur sipsip iri o kabi shigorihwisi ais um. Aria ananis nabes satrugun kabi douk debeihi nyih hanu aria bogaragun um. ¹⁵Aria ananiruh yeriweruh hatrugun abom kabi enyudok brasin kapa iri um douk shashainyeh debeihi nyih aria nyatrugun um. Aria ananah mah heyagwreh debeg kabi worub batogur banaki um. ¹⁶Anan nasuhw 7-poreyiyu unib um ananin yopunyi rogur, aria anat

wanohwiti bainat douk wanohwit eresit wobuwobur iri tatograri ananit nokwat. Aria ananig yamag bogagrag abom kabi wah hatao nyumnah iri hatrugun um.

¹⁷Douk yatrūn aria yanak yabuh yakus hurukatin um ananiruh yeriweruh kabi anan nagok iri arman um. Aria anan nowem ananin yopunyi rogur eik aria nakripe nakri, “Nyak mare nyunogugur, uwok! Eik douk seiwok baugos um ihishmorim eneshenesh eshudok watak enesh shupe uwe aria eik yarig yape. Aria kweipon shopunek abudok nyutob ihishmorim eshudok shunak shutuhuk um, eik ta ipe. ¹⁸Eik douk madae igok iri uwe, uwok. Eik yape iri! Seiwok yagok aria douk yape, aria shopunek ta ipe ihih nyumneh. Aria eik douk yarao debeinyi big aria dodog um ipe debeiwe iri um agundok arpesh shugok um. Um ikri eshesh shunak um yoweiburi wabur o shunak um yopuburi.

¹⁹Douk namudok aria nyak wem eshudok iganigadae nyatrish iri shuni eshudok douk shape shatogur agundok atap iri shuni eshudok douk ta kweipon shugiguk shutograri iri nyakip shup. ²⁰Aria baugenyum baraen riguk nyanabeshuk um oudok 7-poreiyu unib douk nyatik yasuhwo eikin yopunyi rogur iri douk namudok. Oudok unib douk wagraeh um 7-poreish enelahos douk shape sheyoh Iruhin ananish arpesh shape arbudok 7-poreirub warub iri. Aria baugenyum baraen um eshudok 7-poreish shenekesh gol iri um shuwem lamhos um douk nyakrium Iruhin ananish arpesh douk shape arbudok 7-poreirub warub iri.”

Baraen Nyanak um Iruhin Ananish Arpesh Shape Efesus Iri

2 ¹Aria Jisas ta apa nakripe nakri, “Jon, nyak wemen enyudok baraen anap shup nyunak um enyudok ensel douk nyape nyeyoh Iruhin ananish arpesh shape Efesus iri. Eik Jisas eikin baraen douk enyudok. ‘Eik douk yasuhw 7-poreiyu unib eikin yopunyi rogur aria yape yaraeh orokohun um 7-poreish eshudok douk shenekesh gol iri um shape showem lamhosum iri yenekumep-ogu enyudok baraen ipak. ²Eik yadukemesh um ihishmorim aih hani enyudok debeinyi mour ipak pape peneken iri. Aria yadukemep um agundok peyotu dodogowip atip um enenyenen amaen douk nyatogrumep iri. Aria ipak pakri uwok abom um eshudok shenek yoweih aih iri arpesh. Aria shopunek, yadukemep um ipak douk pokwiraeh amudok armam douk henek rohw hakri amam douk aposel douk hakripesh Iruhin ananin baraen iri. Aria ipak padukemam um amam douk madae aposel omi uwe, uwok. Amam douk henek rohwumesh iri. ³Aria shopunek, eik yadukemep um agundok arpesh shatrip um pasuhw eikin baraen pagipeshen um aria shenek yoweih aih um ipak um. Aria ipak peyotu dodogowip aria madae juwehosip uwe. Aria shopunek, eik yadukemep um ipak douk madae arigeh hep um punek enyudok debeinyi mour um pugipesh eik um uwe, uwok. Ipak peyotu dodogowip atip.

⁴Aria douk eik yakri ikripep enen baraen um eshudok yoweishi inahos douk ipak pape penekesh iri. Sagomatin ipak urkwip panawashame dodog abom aria pagipeshe. Aria douk uwok. ⁵Aria eik yakri ipak urkwip purum agundok riguk ipak papeum. Sagomatin ipak pape wosik, aria douk ipak patu pagrukuk rougunum. Ipak urkwip douk madae punawashame dodog uwe, uwok. Aria douk eik yakri ipak ta pukutukuk ipakish yoweishi inahos aria watak putanam puke aparuh eik. Aria ipak urkwip punawashame dodog abom kabi sagomatin ipak urkwip panawashame um. Uwok um, eik ta inaku itukuk ipakin enyudok douk shape showem lam um agundok douk enyen nyape nyataum. ⁶Aria douk ipak watak panasuhw ehudok yopihi aih abom um pakri uwok um ehudok aih douk apudok awirop douk shanahwar um Nikolas^b iri shenekesh iri. Eik shopunek douk yakri um uwok abom.

⁷Aria douk ipak arigos sapenyep iri ta pumnek enyudok baraen Iruhin ananin Mishin nyakrip ananish arpesh-enyi aria pusuwen dodog pugipeshen! Eshudok arpesh douk shiyotu dodogowish atish shunek wanohw shubo yoweinyi nyubuhuk iri, eik ta ikesh yopinyi big um eshesh shuwok epudok shurkwip douk peir enyudok rowog douk nyatao Iruhin ananig nahobig ganahwar um Paradais iri. Aria eshudok arpesh shuwok epudok shurkwip iri ta shupe wosik abom ihih nyumneh.’”

Baraen Nyanak Um Iruhin Ananish Arpesh Shape Smerna Iri

⁸Aria Jisas watak shopunek nakripe nakri, “Jon, nyak wem enyudok baraen anap shup nyunak um enyudok ensel douk nyape nyeyoh Iruhin ananish arpesh shape Smerna iri. Eik Jisas eikin baraen douk enyudok. ‘Seiwok baugos um, ihishmorim eneshenesh eshudok watak enesh shupe uwe aria eik yape. Aria kweipon shopunek, abudok nyutob ihishmorim eshudok shunak shutuhuk um, eik ta ipe. Douk seiwok shae yagok aria douk watak yakitak yape. ⁹Eik douk yadukemesh um enenyenen amaen douk nyatogur um ipak iri. Aria shopunek, yadukemesh um ipak eneshenesh eshudok wokep. Aria uwok. Ipak douk pogrem sabaishi yopishi eneshenesh eshudok shakusumep iruhw heven. Aria eik douk yadukemesh um enyudok yoweinyi baraen douk eshudok arpesh douk shenek rohwmep shakripepen iri. Eshesh shakri eshesh douk Juda aria eshesh madae Juda abom uwe, uwok. Eshesh douk Satan ananish. ¹⁰Aria ipak mare punogugur um enenyenen amaen douk ta nyutogrumep aria nyunekep pumnek debeiri eriger iri. Ipak pumnek! Satan ta nunek anep punak punuweshik pupe um nukwiraehep punek yoweishi inahos. Aria

^b 2:6 Apudok awirop Nikolas apa shani eshesh Kristen shape Efesus bani Pergamum iri shape shenek lotu. Aria eshesh apa shenek skulumesh um shunek eneshenesh yoweishi inahos.

ipak ta pumnek eriger banab nyutob meyoh kabi 10-poreih nyumneh meyoh um. Douk enesh shukri shep pugok um, ipak ta pusuhw eikin yopinyi baraden dodog aria piyotu dodogowip atip. Aria eik ta ituk ipakish nyeiguhw shuto iruhw aria ta inekap pupe wosik ihih nyumneh. Eik ta itaurumep pupe wosik.

¹¹Aria douk ipak arigos sapenyep iri ta pumnek enyudok baraden douk Iruhin ananin Mishin nyakrip ananish arpeshe enyi aria pusuwen dodog pugipeshen! Eshudok arpeshe douk shiyotu dodogowish atish shunek wanohw shubo yoweishi inahos shubuhuk aria eshesh ta mare shugok anah shopunek,^c uwok.’”

Baraden Nyanak Um Iruhin Ananish Arpeshe Shape Pergamum Iri

¹²⁻¹³Aria Jisas nakripe shopunek nakri, “Jon, nyak wem enyudok baraden anap shup nyunak um enyudok ensel douk nyape nyeyoh Iruhin ananish arpeshe shape Pergamum iri. Eik Jisas eikin baraden douk enyudok. ‘Eik douk yasuhw atudok wanohwiti bainat douk wanohwit wobuwobur iri yenekumep-ogu enyudok baraden ipak. Eik douk yadukemesh um ipakibur wabur. Satan douk nape debeini um ipakibur wabur. Aria eik yadukemep um ipak pasuhw eikin baraden dodog pagipesh eik atuwe. Aria eshesh shabo anudok yopuni arman Antipas douk nasuhw eikin baraden dodog abom nakripeshen iri nagok ipakibur wabur douk Satan napenyabur. Aria abudok nyutob eshesh shan nagok um, ipak shopunek peyotu dodogowip aria madae pukri punyukur-ukuk eikin baraden uwe, uwok.

¹⁴Aria douk eik yakri ikripep enen baraden ipak um enesh yoweishi inahos douk ipak pape penekesh iri. Ipak anep douk wata pasuhweh dodog ehudok Balam ananish yoweishi aih. Ananish aih douk ehudok. Seiwok anan neyabigan ehudok yoweishi aih Balak aria Balak nenek rohwa um eshesh Israel shenek yoweishi inahos um shakonuguk agabus Iruhin. Balak douk nakripesh shawok eshudok mahish iri worigun douk sharik shenek ofamesh shako amudok madae adurimi god omi iri uwe. Aria shopunek, nakripesh shenek wehrur um. ¹⁵⁻¹⁶Aria douk shopunek namudok atin. Ipak anep douk pasuhw ehudok yoweishi aih ehudok apudok awiropish arpeshe shahwadesh um Nikolas^d iri esheshih. Douk namudok aria ipak ta pukeshuk agabus yoweishi inahos ipak pape penekesh iri aria watak putanam pukon aparuh Iruhin. Uwok um, eik ta hurukatin um inaku aria ini eshudok douk shagipesh ehudok eshesh Nikolas esheshih aih iri murpak. Aria ta ikumesh atudok bainat

^c 2:11 Jisas watak nutanamori ahi, shagok iri ta watak shukitak aria shiyotu um kwot. Aria eshudok douk madae shunek bilip iri uwe ta shunak um yoweiburi wabur aria ta shugok anah shopunek. ^d 2:15-16 Putik futnot nyape Revelesen 2:6 iri.

douk tatograri eikit nokwat iri. ¹⁷Aria douk ipak arigos sapenyep iri ta punnek enyudok baraen Iruhin ananin Mishin nyakrip ananish arpeshe-nyeni aria pusuwen dodog pugipeshen! Eshudok arpeshe douk shiyotu dodogowish atish shunek wanohw shubo yoweishi inahos shubuhuk iri, kweipon eik ta ikesh anagun worigun douk shahwaragun um mana douk nyanabeshuk nyakus iri. Aria shopunek, eik ta iwem esheshish namushi nyeiguhw anabor shigorihiwi-bori utabor aria ta ikesh aburdok utabor eshesh atin atin. Aria kupaishi arpeshe ta mare shudukem eshudok namushi nyeiguhw, uwok. Eshudok douk sharao aburdok utabor iri atish ta shudukemesh.’”

Baraen Nyanak Um Iruhin Ananish Arpeshe Shape Taiataira Iri

¹⁸Aria Jisas nakripe nakri, “Jon, nyak wem enyudok baraen anap shup punak um enyudok ensel douk nyape nyataurum Iruhin ananish arpeshe shape Taiataira iri. Eik Jisas eikin baraen douk enyudok. ‘Eik Iruhin ananin nunganin douk eikis nabes satrugun kabi debeihi nyih hanu aria bogaragun um. Aria eikiruh yeriwuruh hatrugun kabi enyudok bras kapa douk shishainyeh debeihi nyih iri nyatrugun um. Eik yenekumepogu enyudok baraen ipak.

¹⁹Eik yadukem ehudok yopihi aih ipak pape penekheh iri um agundok ipak urkwip panawasham Iruhin nani kupaishi arpeshe um. Aria pasuhw eikin baraen dodog pagipeshen aria douk penek yopinyi mour um putaurum sabaishi arpeshe um. Aria shopunek, ipak peyotu dodogowip atip abudok nyutob amaen nyatogrumep um. Aria eik yadukemesh um ehudok yopihi aih douk ipak pape penekheh iri douk heshagrakuk ehudok yopihi aih riguk ipak parik penekheh iri.

²⁰Aria douk eik yakri ikripep enen baraen um eshudok yoweishi inahos douk ipak pape penekesh iri. Ipakish yoweishi inahos douk eshudok. Ipak pakri wosik aria pape patruk meyoh okwudok yoweikwi armatok Jesebel aria okwok douk kwani ipak kwape. Okwok douk kwenek rohwi kwakri okwok douk onok profet douk kwakripesh Iruhin ananin baraen iri. Aria okwok douk kwenek rohwi iri. Okwok kwenek rohwi um eshudok shenek eikin mour iri kwakripesh shenek wehrur um. Aria shopunek, shawok agundok worigun douk shenek ofamogun um amudok madae adurimi god omi iri uwe. ²¹Aria eik douk yakutukuk kwape anah nyumneh shopunek um yakri kwukeshuk agab okwokwish yoweishi inahos um agundok kwani kupaishi shenek wehrur um. Aria yakri watak kwutanam kwunakumori eik, aria uwok. ²²Douk namudok aria eik ta inekok kwishuh kwutuwatagun um kwumnek debeiri eriger. Aria ta eshudok arpeshe douk shani okwok shenek wehrur iri mare shukeshuk agabus esheshish yoweishi inahos aria shatanam shunakumori eik um, eik ta inekesh namudok. Eik ta inekesh shumnek debeiri eriger

abom. ²³Aria shopunek, eik ta ibo eshudok douk shagipesh okwokwin baraden iri shugok. Eik ta inekesh namudok aria ihishmorim Iruhin ananish arpesh ta shudukemesh shukri eik douk yadukemesh wosik abom um ihishmorim arpesh esheshish mishish aria aparuh shor shanak um. Aria eik ta iwanamep eneshenesh wosikumep atin atin um ihihmorim aih ipak pape penekeh iri.

²⁴Aria douk eik yakri ikrip ipak anep douk pape Taiataira iri. Ipak madae pugipesh enyudok okwokwin yoweinyi baraden uwe. Aria shopunek, ipak madae pugipesh ehudok aih douk enesh kupaishi shahwareh shakri, “Satan ananish aih douk hanabeshuk atin abom iri.” Aria eik ta mare watak ikripep enen kupainyi baraden shopunek um ipak pugipeshen iri, uwok. ²⁵Aria eik yakri ipak ta pusuhw ehudok ihihmori yopihi aih iri baraden douk ipak paraen iri. Aria piyotu dodogowip atip arigaha eik watak itanamori.

²⁶⁻²⁷Aria eshudok arpesh douk shugipesh eikim urkum aria shiyotu dodogowish atish shunek wanohw shubo yoweishi inahos shubuhuk arigaha esheshib nyutob um shugok um butogur um, eik ta inekesh namudok. Eik ta ikesh debeishi dodogowishi nyeiguhw um shupe debeishi um sabaishi arpesh douk shape ihigos nahobigos iri. Aria eshesh ta shupe debeishi shusuhw merikw-umesh namudok atin kabi douk seiwok eikin Yain neke debeinyi nyeigur aria yape debeiwe iri yasuhw merik um sabaishi arpesh um. Enyudok ta nyutogur kabi Iruhin ananin baraden douk nyetem ananik Buk iri nyakrium. Iruhin nakri namudok, “Anan ta nupe dodogowin atun abom aria ta nusuhw anam ainim butum aria nupe nusuhw merikw-umesh. Anan ta nunekesh kabi anan arman douk nawor marus shenekas amnab iri pupuwaros shokugun atugun um.”

²⁸Aria eik ta ikesh okwudok unuk douk kwanahwar um shuduwi iri. ²⁹Aria douk ipak arigas sapenyep iri ta pumnek enyudok baraden Iruhin ananin Mishin nyakrip ananish arpesh-enyi aria pusuwen dodog pugipeshen!”

Baraden Nyanak Um Iruhin Ananish Arpesh Shape Sardis Iri

3 ¹Aria Jisas nakripe nakri, “Jon, nyak wem enyudok baraden anap shup nyunak um enyudok ensel douk nyape nyeyoh Iruhin ananish arpesh shape Sardis iri. Eik Jisas eikin baraden douk enyudok. ‘Eik douk yasuhw Iruhin ananish 7-poreish yopishi mishish^e shani 7-poreiyu unib aria yenekumep-ogu enyudok baraden ipak.

Eik douk yadukemesh um ihihmorim eneheneh aih ipak pape penekeh iri. Arpesh shatrip um, eshesh shakri ipak madae pugok iri uwe. Aria uwok, ipak nubokadae pagok iyoh. ²Douk namudok aria ipak pikitak

^e 3:1 Putik futnot nyape Revelesen 1:4 iri.

pukutukuk agundok ipak peshuh um. Aria ihihmorim ipakih yopihi aih douk ipak wata pasuweh iri, eheh douk hurukatin um hugok. Douk namudok aria ipak ta pikitak aria punekeh dodogowih abom atih. Um maresh? Eikin debeini Iruhin natik ipak penekheh iri aih jurug aria nakri eheh douk madae yopih uwe, uwok. ³Douk namudok aria ipak wata urkwip purum enyudok baraeen douk seiwok ipak pemneken iri aria wata pugipeshen. Aria putanam pukeshuk agabus yoweishi inahos aria wata punakumori eik. Uwok um, eik ta inaku kabi anan nakwuaruh iri nanakumagu aria ipak ta mare pudukemesh um abudok nyutob eik inaku itogrumep obi nyutob.

⁴Aria ipak karowip pape Sardis iri madae pugipesh yoweih aih uwe. Aria enyudok enyen douk kabi ipak madae punek ipakih rupeh hubosusih um uwe. Aria ipak atip ta pur ehudok shigorihiwihi rupeh aria puni eik munak atugun. Um maresh? Ipak douk yopishi arpesh aria ipak douk wosik um puni eik munak atugun um. ⁵Aria eshudok arpesh douk shiyotu dodogowish atish shunek wanohw shubo yoweishi inahos shubuhuk iri, eik ta ikesh ehudokmori shigorihiwihi rupeh shihur. Eshesh ta shihur kabi ipak karowip pape Sardis iri pehur um. Aria eik ta mare itorihuk esheshish nyeiguhw douk shatem okwudok buk douk eshudok arpesh ta shupe wosik ihih nyumneh iri esheshish nyeiguhw shatemokwi, uwok. Aria eik ta ikrip eikin Yain nini ananish enselahos yopugunum um eshudok arpesh ikri eshesh douk eikish arpesh. ⁶Aria douk ipak arpesh arigos sapenyep iri ta pumnek enyudok baraeen Iruhin ananin Mishin nyakrip ananish arpesh-enyi aria pusuwen dodog pugipeshen.’ ”

Baraeen Nyanak Um Iruhin Ananish Arpesh Shape Filadelfia Iri

⁷Aria Jisas nakripe nakri, “Jon, nyak wem enyudok baraeen anap shup nyunak um enyudok ensel douk nyape nyeyoh Iruhin ananish arpesh shape Filadelfia iri. Aria eik Jisas eikin baraeen douk enyudok. ‘Eik douk yopuweiri abom douk aria eikin baraeen douk adurin atin yasuhw ki^f um atudok wit douk seiwok King Devit nasuwen iri. Aria ta eik ijik wit um, ta mare enen arpen dodogowin um nyutaru. Aria shopunek, ta eik itaru um, ta mare enen arpen dodogowin um nyijikat. ⁸Eik douk yadukemesh um ihihmorim aih ipak pape penekheh iri. Aria shopunek, eik yadukemesh um ipak douk madae dodogowip um punek eikin mour wosik um uwe. Aria ipak pagipesh ihinyumorim eikin baraeen aria madae pubeshuk eikin nyeigur uwe, uwok. Aria ipak tik. Eik yejik anat wit tanejik tapeimep. Aria ta mare enen arpen dodogowin um nyutaru,

^f 3:7 Enyudok baraeen nyakri Jisas Kraiss atun narao big um nukri meishi arpesh shuwish numun Iruhin ananibur namuburi wabur Jerusalem douk ta bukutukuk iruhw heven bubuhi iri (Revelesen 21:2).

uwok. ⁹Aria ipak pumnek! Ipak douk padukemesh eshudok Satan ananish arpesh. Eshesh shenek rohwi shakri eshesh douk Juda, aria eshesh douk madae Juda abom uwe. Eshesh douk shenek rohwi iri. Douk namudok aria eik ta inekesh shunaki shubuh shuduk ohrubus hurukatin um ipakiruh yeriweruh. Aria abudok nyutob eshesh ta shudukemesh shukri adur atin eik douk urkum manawashamep ipak Iruhin ananish arpesh pape Filadelfia iri. ¹⁰Ipak douk pagipesh eikin baraan wosik peyotu dodogowip aria madae juwehosip arigas uwe um enenyenen amaen douk nyatogrumepari. Namudok aria abudok nyutob eneheneh kwiraeh hutogur um hukwiraeh ihishmorim arpesh shape agundok atap iri um, eik ta itaurumep piyotu dodogowip atip aria pupe wosik.

¹¹Aria eik douk hurukatin um inaku. Douk namudok aria ehudok yopuhi aih ipak pagipesheneh penekheh iri ipak ta gamo pusuweh dodog. Ta wosik atin enesh kupaishi arpesh shutrip shuraoukuk enyudok ipakin yopinyi prais douk ta ipak puraen iri. ¹²Aria eshudok arpesh douk shiyotu dodogowish atish shunek wanohwi shubo yoweishi inahos shubuhuk iri, eik ta inekesh shiyotu dodogowish atish kabi anohwi urohwi douk hwatao hwosah eikin debeini Iruhin ananit debeiti urupat iri. Aria eshesh ta mare wata shukutukuk shutogur shunak, uwok. Eik ta iwem eikin Iruhin ananin nyeigur nyuni ananibur namuburi wabur Jerusalem ababurin nyeigur nyutem eshudok arpesh esheshiruh yegeshiweruh. Abrudok wabur ta bukutukuk iruhwi heven douk eikin Iruhin napeum bubuhi iri. Aria eik shopunek ta iwem eikin naminyi nyeigur nyutem esheshiruh yegeshiweruh. ¹³Aria douk ipak arigos sapenyepi um ta pumnek enyudok baraan Iruhin ananin Mishin nyakrip ananish arpeshenyi aria pusuwen dodog pugipeshen.’”

Baraan Nyanak Um Iruhin Ananish Arpesh Shape Laodisia Iri

¹⁴Aria Jisas nakripenakri, “Jon, nyak wem enyudok baraan anap shup nyunak um enyudok ensel douk nyape nyeyoh Iruhin ananish arpesh shape Laodisia iri. Eik Jisas eikin baraan douk adurin. Enyen douk enyudok. ‘Eik douk yeyotu dodogoiwe atuwe abom yakripesh yopinyi abom wosik Iruhin ananin adurin atinyi baraan iri. Aria eik douk baugos um ihishmorim eshudok eneshenesh douk Iruhin nenekesh shape iruhwi atap iri shani ihishmorim arpesh. Eik yenekumepogu enyudok baraan ipak. ¹⁵Eik yadukemesh um ehudok aih ipak pape penekheh iri um pape penek eikin mour um. Ipak douk madae nyumanugasip abom uwe aria shopunek, madae juwehosip abom uwe. Aria eik yakri ipak ta nyumanugasip abom o juwehosip abom. ¹⁶Aria uwok. Ipak madae juwehosip abom uwe o madae nyumanugasip abom uwe. Ipak juwehosip karowih atin. Douk namudok aria eik ta igugurukwep putograri eikit nokwat! ¹⁷Aria ipak pakri, “Apak manabuk sabaibori utabor bani

sabaishi eshudok eneshenesh. Apak madae yaruhish um enesh eshudok eneshenesh uwe.” Aria ipak pape yowep abom. Aria arpesht ta shutrip aria shenek gihaumep. Eik yatrip um, ipak douk kabi yaruhish um eneshenesh yopishi eshudok iri um. Ipak kabi douk nabes seshukeshi arpesht um. Ipak kabi douk rupeh wokep aria pagor pape um. Aria ipak douk madae pudukemesh uwe. ¹⁸Douk namudok aria eik yakri ikripep enyudok baraen. Eikir gol douk debeihi nyih hanur aria henekar ratogur yopur abom. Douk namudok aria ipak putor arudok gol um, ipak ta putogur debeipari kabi shogrem sabaibori utabor iri um. Aria punator shigorihwihi rupeh aria pihur um punoshigar ipakiruh yegeshiweruh um arpesht mare shutrip pugor pupe aria abraen nyupeyep, uwok. Aria shopunek, ipak putor marasin aria punayok nabes um ipak wata putrugun wosik. ¹⁹Eshudok arpesht douk eik urkum manawashamesh iri, eik ta ihesh um inekesh shutogur yopishi arpesht abom. Douk namudok aria ipak urkwip ta purum ipakih aih aria pukeshuk agabus yoweishi inahos aria pukon aparuh Iruhin abom. ²⁰Ipak pumnek! Eik yeyotu wit aria yape yarigep. Aria meinyi arpen douk nyumneke aria nyijikume wit iri, eik ta iwish ini enyen upe numun. Aria ohwak ta upe uwok worigun atugun.

²¹Aria eshudok douk shiyotu dodogowish atish shunek wanohw shubo yoweishi inahos shubuhuk iri, eik ta ikesh debeinyi nyeigur um shupe debeishi aria shuni eik mupe eikin debeinyi wagitur. Kabi douk seiwok eik yeyotu dodogoiwe yenek wanohw yabo yoweishi inahos shabuhuk aria douk yape debeiweiri yani eikin Yain wape ananin debeinyi wagitur um. ²²Aria douk ipak arigos sapenyep iri um ta pumnek enyudok baraen Iruhin ananin Mishin nyakrip ananish arpesht-enyi aria pusuwen dodog pugipeshen!’ ”

Shenek Lotu Um Iruhin Gani Iruhw Heven

4 ¹Douk enyudok nyanakuk aria eik yatik anat wit tanajik tape iruhw heven. Aria yemnek anah mah. Aria enyudok arpen nyeyagwreh debeg kabi shahapur oruhw-umori douk iganigadae yemneken nyeyagwrehi iri nyakripe nyakri, “Nyak nyutowi agundok iruhw aria iyabigen eshudok eneshenesh douk ta shutogur iri.” ²Aria ahudok atuh Iruhin ananin Mishin nyatogrume dodogowin atin aria yatigu enen debeinyi wagitur douk king-omi atum hapenyen iri nyakus iruhw heven. Aria anan arman nape enyudok wagitur. ³Anan natrugun kabi anam yopumi abom utom nyeigurim um jasper iri um mani kupaimi owishiborimi nyeigurim um konilian iri batrugun um. Aria enen renbo nyakus aria enenyir yamuger rakih rananug enyudok debeinyi wagitur. Enyudok renbo douk yopin abom kabi anam yopumi grinporeim utom nyeigurim um emeral iri um. ⁴Aria 24-poreish debeishi wagiturahos

shopunek shakus sherssharih um enyudok debeinyi wagitur. Aria anam debeimi armam 24-poreim hatem eshudok wagiturahos. Amam hore shigorihiwi rupeh aria howem yopugwi hatog shenekog gol iri douk king-omi atum hogwem iri. ⁵Aria utag bogaragi gani enyudok debeinyi wagitur nyakus um aria utag brereyarog geyagwreh debeg. Aria hurukatin um enyudok debeinyi wagitur 7-poreish ourehish douk hanish atish iri shakus. Eshudok ourehish douk shakri wobuwobren baraan um Iruhin ananish 7-poreish yopishi mishish.⁶ ⁶Aria hurukatin um enyudok debeinyi wagitur, enen enyudok kabi douk debeigwi youg um nyakus. Enyen nyatrugun abom nyape kabi wenyir um. Aria eshudok 4-poreish dodogowishi eshudok douk mishish shoresh iri shape orokohun aria shape sherssharih um enyudok debeinyi wagitur. Aria sabaisi nabes sape yamagosish um shani aparuhish um shani agabusish um. ⁷Aria nyarik iri dodogowinyi douk mishin nyoren iri douk nyape kabi enen debeinyi wanohwinyi mahin nyeigurinum laion iri. Aria nyagiguk iri nyape kabi enen abonin bulmakau um. Aria binyatin iri enyenyig yamag gape kabi arpenyig yamag um. Aria nubatin-enyi nyape kabi anan debeini kumun nehuru nanak iruhw iri um. ⁸Aria eshudok nubatish, eshesh atin atin douk anawipish kapraigiyohos shapenyesh. Aria numuniruh um hani adukiruh um esheshiruh yegeshiweruh ihiruhmorim douk shukniruh abom um nabes atus. Aria nyumneh weibus eshesh shapeum shakri,
 “Debeini Iruhin douk dodogowini abom.

Anan douk yopuni abom, anan douk yopuni abom,
 anan douk yopuni abom.

Seiwok nape, aria douk shopunek nape,
 aria kweipon shopunek ta nunaki.”

Eshesh madae shupe um shurao uhwin atin um shakri enyudok baraan um uwe. ⁹⁻¹¹Eshesh shape shatuk Iruhin douk nape enyudok debeinyi wagitur iri ananin nyeigur nyato iruhw. Anan douk nape ihih nyumneh iri. Eshesh shanadudareh-uman shenek tenkyuman shakri anan yopuni. Aria abudok nyutob eshudok nubatish dodogowishi douk mishish shoreshi shenekesh namudok um, amudok 24-poreim debeimi habuh hoduk ohrubus hurukatin um Iruhin douk nape wosik abom ihih nyumneh iri douk nape enyudok debeinyi wagitur iri aria hape henek lotuman. Amam honik amamig yopugwi hatog douk king-omi atum hogwem iri hawashog hurukatin um enyudok debeinyi wagitur aria hakri,

“Apakin debeini Iruhin, nyak douk
 dodogowinyi yopunyi abom.

Aria ihishmorim arpesht ta shutuk nyakin atin nyeigur nyuto iruhw.
 Um maresh? Nyak nyagipesh nyakim atum urkum

⁸ 4:5 Putik futnot nyape Revelesen 1:4 iri.

aria nyenek ihishmorim eneshenesh eshudok shatogur shape aria nyorukesh yapis.
Eshesh douk nyakim urkum atum morumesh nyakriyesh
aria eshesh shatogur shape.”

Jon Natik Onok Buk Douk Shaweshigok Iri

5 ¹Aria eik Jon yatik anudok arman douk natem enyudok debeinyi wagitur iri nasuhw onok buk ananin yopunyi rogur. Okwudok buk okwok douk kabi anap roupi shup um. Okwok douk shadareshok aria showeshigok. Aria baraan shenyem nyape numunik um kwani aduk shopunek. Aria showeshigok 7-poreih shakwu kendelis gris. ²Aria eik yatik enen dodogowinyi ensel nyape nyeyagwreh debeg nyakri, “Meinyi arpen douk yopin abom aria wosik um nyubahiguk asudok kendelis gris douk showeshik okwudok buk um aria nyukweshihok?” ³Aria madae shutik enen atin arpen nyape iruhw heven iri o agundok atap iri o shakamum agundok atap iri douk ta wosik um nyukweshih okwudok buk aria nyutik numunik um iri. ⁴Aria douk yatik um madae shuparug enen arpen uwe douk wosik um nyukweshih okwudok buk aria nyutik numunik um iri. Douk namudok aria eik yereh debeg. ⁵Aria anan um amudok 24-poreim debeimi nanaki nakripe nakri, “Kwamnek! Nyak mare nyureh! Anan arman um apudok awirop nyeigurip um Juda iri douk nakitak Devit ananip awirop iri douk dodogowin kabi enen wanohwinyi mahin nyeigurinyum laion iri. Anan douk neyotu dodogowin atun nenek wanohw nabo yoweishi inahos shani ihishmorim ananish horim shabuhuk. Douk namudok aria anan douk dodogowin aria wosik um nubahiguk asudok 7-poreis kendelis gris douk showeshik okwudok buk um aria nukweshihok.”

Jon Natik Enen Nugaen Sipsip

⁶Aria yatigu enen Nugaen Sipsip nyeyotu hurukatin um enyudok debeinyi wagitur. Aria eshudok nubatish dodogowishi douk mishish shoresh iri shani amudok 24-poreim debeimi sheyotu shersharieh enyudok Nugaen Sipsip. Enyen nyubrug gwapenyen kabi shaen nyagok iri um. Enyen 7-poreiruh shuwaruh hakih enyenyig barag aria 7-poreis nabes sapenyen. Asudok nabes douk sakri wobuwobren baraan um Iruhin ananish 7-poreish mishish^h douk anan neshopokesh shanak ihigunmorim um agundok atap iri. ⁷Aria enyudok Nugaen Sipsip nyanaki nyatron okwudok buk anudok douk nasuok yopunyi rogur aria nape debeinyi wagitur iri. ⁸Douk enyen nyatronok aria eshudok nubatish dodogowishi douk mishish shoresh iri shani amudok 24-poreim debeimi shabuh

^h 5:6 Putik futnot nyape Revelesen 1:4 iri.

shaduk ohrubus shakus hurukatin um Nugaen Sipsip aria shenek lotumen. Aria ihim-morim amudok debeimi hasuhw sisigish atish enesh eshudok kabi gitahas um shani anas dis douk shenekas gol iri. Asudok dis douk shuknis um enyudok paura douk enyenyigus nyugus seisik wosik iri. Enyudok paura douk nyakri wobuwobren baraen um beten douk Iruhin ananish arpes shape shenekan iri. ⁹Aria eshesh shape sheyarub onohw namuhwi awehw shakri,

“Nyak douk yopuni abom aria wosik um nyutrunkwudok buk aria nyukweshih ihismorim kendelis gris douk showeshigok um. Um maresh? Eshesh shaen nyagok aria nyakibor owishibor batourak bator ihismorim awirosish arpesha aria bakweshihesh shape Iruhin ananish atish. Eshesh douk shape ihismorim sisigis debeisi awiros aria shenyagwreh sabainyi kupainyi baraen iri. Eshesh douk sabairuhi sisigiruh yegeshiweruh-ish arpesha douk shape ihirubmorim debeirubi warub nahobigos abudok amnab agundok atap iri.

¹⁰ Nyak douk nyenekam hatogur pris douk hape henek ofa um eneshenesh eshudok hako apakin Debeini Iruhin iri. Aria anan ta nupe Debeini nusuhw merikw-umesh aria kweipon eshesh ta shupe debeishi kabi douk debeimi king-omi aria shusuhw merik um ihismorim arpesha shape agundok atap iri.”

Eshesh Shatuk Nugaen Sipsip Enyenyin Nyeigur Nyato Iruhw

¹¹ Aria wata shopunek yatrugunugu aria yemneku eshudok sabaishi Iruhin ananish enelahos esheshih meh. Shadarehesh um douk shatogur sabaishi abom. Sabaibi tausenab bani sabaibi milionab. Eshudok sabaishi enelahos sheyotu sherssharih enyudok debeinyi wagitur nyani eshudok nubatish dodogowishi douk mishish shoresh iri shani amudok 24-poreim debeimi armam. ¹² Aria eshudok enelahos sheyarub debeg shakri,

“Enyudok Nugaen Sipsip douk seiwok shaen nyagok iri douk yopunyi abom.

Douk namudok aria enyen douk wosik um nyirao debeinyi nyeigur nyuni utabor buni eneshenesh yopishi eshudok shuni debeinyi dodog.

Aria shopunek enyen douk wosik um nyurao yopinyi saki aria wosik um apak mutuk enyenyin atin nyeigur nyuto iruhw. Aria enyen douk wosik um apak munadudareh-umen abom aria mutuk enyenyin atin nyeigur nyuto iruhw aria munek lotumen.”

¹³Aria eik yemnek ihishmorim eshudok douk Iruhin nenekesh shape iruhw atap iri shani eshudok douk shape shakam agundok atap iri shani ihishmorim shape shakam debeigwi youg iri shape sheyarub onohw awehw shakri,

“Apak makri ihishmorim eneshenesh eshudok shunadudareh um anudok nape debeinyi wagitur iri nini Nugaen Sipsip.

Aria shutuk esheshish nyeiguhw shuto iruhw aria shunek lotumesh ihih nyumneh.

Aria makri ihinyumorim debeinyi dodog nyuni agundok natrugun aria nape dodogowini um shupe um eshesh biyesh ihih nyumneh!”

¹⁴Aria eshudok nubatish dodogowishi douk mishish shoresh iri shakri, “Adur atin!” Aria amudok 24-poreim debeimi armam habuh hoduk ohrubus atap aria henek lotu um Iruhin nani Nugaen Sipsip.

Nugaen Sipsip Nyabrig Kendelis Gris Soweshik Buk Iri

6 ¹Aria yatigu Nugaen Sipsip nyohur okwudok buk douk shadareshok showeshigok 7-poreis kendelis gris iri nyasuok aria nyabahiguk sarig iri kendelis gris. Aria eik yemnek enen sagomatin um eshudok nubatish dodogowishi douk mishish shoresh iri nyeyagwreh. Aria enyenyih mah heyagwreh um kabi douk utag pogarog um. Aria enyen nyakri, “Nyak yowi.” ²Aria yatigu enen shigorihwinyi hos nyanaki. Aria anudok arman natem enyudok hos iri nasuhw enen kein. Aria shopunek, shakon anat yoputi hat douk eshudok arpesh douk shenek uhwinyum wanohw iri shogur iri. Aria abudok nyutob anan natem hos nanak kabi anan nenek uhwinyum wanogwiruh aria nakri nunek onohw shopunek wanohw nunek uhwinyumoh iri. ³Aria Nugaen Sipsip nyabahiguk sagiguk iri kendelis gris aria eik yemnek enyudok nyagiguk iri dodogowinyi douk mishin nyoren iri nyakri, “Nyak yowi!” ⁴Aria yatigu enen owishiborinyi nyatrugun iri hos nyanaki. Aria anudok arman natem enyudok hos iri narao dodog um nuhur shape agundok atap iri arpesh esheshiruh aparuh um shurpak aria shubo kupaishi shugok. Aria shakon anat debeiti bainat.

⁵Aria Nugaen Sipsip nyabahiguk binyatinyis kendelis gris aria eik yemnek binyatin-in enyudok dodogowinyi douk mishin nyoren iri nyakri, “Nyak yowi!” Aria eik yatrugunugu aria yatigu enen behrabinyi hos nyanaki. Aria anudok arman natem enyudok hos iri nasuhw enen skel douk shape shenek skelum eshudok eneshenesh um ananis wis. ⁶Aria yemnek enen enyudok kabi douk enen arpen enyenyih mah um. Enyen nyeyagwrehi agundok eshudok nubatish dodogowishi douk mishish shoresh iri shapemori. Aria enyudok nyeyagwrehi iri nyakri, “Nyak nyunak nyunek nyakin mour aria arpesh ta shugok um nyurub. Wit iri bali ta karowish atish aria ta shutoumesh um debeibori utabor. Douk

namudok aria shunek mour atuh nyumnah shurabor iri utabor ta wosik um shutor atop shokupi marup um wit, o bias atop shokusi marus um bali kabi douk rais um. Aria agusudok rowos douk shape shenek wel-agos iri sani agosudok douk shadi wainip shuruwep-agosi nyak mare nyununugos!”

⁷Aria Nugaen Sipsip nyubahiguk nubatis kendelis gris soweshik okwudok buk iri. Aria eik yemnek nyagiguk iri nubatin dodogowinyi enyudok mishin nyoren iri nyakri, “Nyak yowi!” ⁸Aria eik yatigu enen akitoihinyi hos nyanaki. Aria anudok natemori enyudok hos iri ananin nyeigur douk nanahwar Gok. Aria anudok anan douk debeini nasuhw merik um abrudok wabur douk shagok iri shapenyaburi nagimani. Aria arpesh shape agundok atap iri shenesiyao um nubatis awiros. Aria amam harao dodog um hubo anap awiropish eshudok arpesh shugok. Enesh hakwumesh bainatog haesh shagok, aria enesh shagok um nyurub. Aria enesh yoweih arugeh haesh aria shagok, aria enesh wanohwishi wanarish mahish shaesh shagok. ⁹Aria Nugaen Sipsip nyabahiguk anas wisish kendelis gris soweshik okwudok Buk iri. Aria eik yatigu eshudok arpesh douk seiwok abom shasuhw Iruhin ananin baraen dodog shakripesh um agundok Jisas nataurumesh um aria kupaishi arpesh shaesh shagok iri esheshish mishish. Eshesh shape shakam enyudok alta douk shape showem eshudok um shenek ofamesh shako Iruhin iri um. ¹⁰Aria eshesh shahwar debeg shakri, “Dodogowini Debeini, nyak douk adurinyi yopunyi abom nyasuhw iruhw atap iri! Ta makwunih nyumneh hunak hudiguk aria nyak kadak nyunekumesh kwotog agundok atapishi arpesh um nyuwanamesh yoweishi inahos um agundok shabo apak magok um?”

¹¹Aria Iruhin nekesh rouhi shigorihwihi rupeh um atin atin eshudok arpeshish mishish aria nakripesh namudok nakri, “Ipak pupe pishukabar banab nyutob shopunek um arigaha shubo ipakish ashukenyish owashish douk shani ipak panuboum penek atin mour iri shugok kabi douk shabo ipak pagok um ba iyoh. Douk eshesh shesh shugok arigaha shunak shutogurum enyudok namba eik yakriyen iri aria eik ta kadak iwanom-umep ereb.”

¹²Aria yatigu Nugaen Sipsip nyabahiguk anawipis kendelis gris douk soweshik okwudok buk iri aria debeikwi enyik kwatuk agundok atap. Aria nyumnahin aun natogur behrabin kabi anah yoweih behrabihi rupah um. Aria wabin aun natogur owishiborin kabi owishibor um. ¹³Aria unib wape iruhw utag iri wanatuk wagruki atap kabi enep watakipi fikip shuruwep douk dodogowinyi uhwin nyasusuep tutukarep pagruk-umori um. ¹⁴Aria iruhw utag ganak gawishuk kabi shadaresh anap jarukwip um. Aria ihiruhmorim yodururuh hani unaihos shanak abom shapeik kupaigunum.

¹⁵Aria amudok hape king um agundok atap iri hani anam debeimi nyeiguhw shatoumami, hani amudok debeimi hasuhw merik um ami iri, hani eshudok douk shanagrem sabaibori utabor bani jah iri, shani eshudok dodogowishi arpes, shani ihishmorim arpes douk shape shakamum kupaishi shenekumesh mour meyoh iri, shani eshudok douk shape wosik iri, eshesh ihishmorim shanak shawish shanabeshuk shape hurupiruh hani debeiwori burbudugiyu douk watao yodururuh iri. ¹⁶Aria eshesh shahwar yodururuh hani debeibori utabor shakri, “Ipak pubuh pishapomapuk um anudok nape debeinyi wagitur iri um mare nutrup. Aria shopunek um pubeshukapaguk um Nugaen Sipsip juwehosin um mare nyunekumap kwotog aria nyunekap murao debeiri eriger. ¹⁷Um maresh? Ahudok debeih nyumnah um anudok nape debeinyi wagitur iri nini Nugaen Sipsip amam juwehosim um huwanamesh eneshenesh yoweishi inahos eshesh shape shenekesh iri um douk hatogur. Douk namudok aria omi ta dodogowin um nyunek uhwinyumam? Adur atin ta uwok.”

Sabaishi Israel 144,000-Poreish Sharao Iruhin Ananin Kak

7 ¹Douk enyudok nyanakuk aria eik yatrugunugu aria yatigu nubatish enselahos sheyotu anagas um nubatin kona um agundok atap um agudok nahobig. Aria eshesh shasuhuk uhwin douk nyahur nubatin kona iri um mare nyahur agundok atap o nyahur youg o nyahur nyususuhw enen rowog. ²Aria wata yatigu kupainyi ensel nyatowi nyanaki iruhw gani aun nakihumori. Enyen nyasuhwi enen enyudok douk Iruhin nape abom ihih nyumneh iri ananin kak nyapeyenyi. Aria nyahwadesh debeg eshudok nubatish enselahos douk Iruhin nekesh dodog um shununu agundok atap nini youg iri. ³Enyen nyakri, “Ipak mare arigas pununu agundok atap nini youg iri rowos, watak. Apak makri muwem-umesh Iruhin ananin kak nyupe yomogos um eshudok arpes douk shenek apakin Iruhin ananin mour iri ba iyoh aria ipak kadak pununu eshudok eneshenesh.”

⁴Aria eik yemnek um shadareh eshudok arpes douk sharao Iruhin ananin kak iri. Eshesh shadarehesh shanak shatogur sabaishi um 144,000-poreish. Eshudok sabaishi arpes douk shanaki asudok ihismorim 12-poreis debeisi awiros um eshesh Israel. ⁵Apudok awirop shahwarop um Juda iri, sharao kak aria shatogur 12,000-poreish. Aria apudok anap awirop shahwarop um Ruben iri 12,000, aria apudok shahwarop um Gat iri 12,000. ⁶Aria apudok shahwarop um Aser iri 12,000, aria apudok shahwarop um Naptali iri 12,000. Aria apudok shahwarop um Manase iri 12,000. ⁷Aria apudok shahwarop um Simeon iri 12,000, aria apudok shahwarop um Livai iri 12,000. Aria apudok shahwarop um Isakar iri 12,000. ⁸Aria apudok shahwarop um Sebulun

iri 12,000, aria apudok shahwarop um Josep iri 12,000. Aria apudok shahwarop um Benjamin iri 12,000. Asudok awirosish arpesh sharao Iruhin ananin kak.

Sabaishi Arpesh Shenek Lotu Um Iruhin

⁹Douk enyudok nyanakuk aria eik yatrugunugu aria yatigu sabaishi sisigiruh yegeshiweruh-ish arpesh. Eshudok arpesh douk madae wosik um shudarehesh uwe, uwok. Eshesh douk ihismorim debeisi awirosish arpesh douk sheneyagwreh sabainyi kupainyi baraen iri. Eshesh douk shanaki ihigos-morim nahobigos douk sape agundok atap iri shantorum shape. Eshesh shore shigorihiwihi rupeh aria shasuhw palmenis shus esheshis wis aria sheyotu hurukatin um enyudok debeinyi wagitur nyani Nugaen Sipsip. ¹⁰Aria eshesh shahwar debeg shakri,

“Apakin Iruhin douk nape debeinyi wagitur iri nani Nugaen Sipsip امام atum abom hanarap matanamori mape wosik.”

¹¹Aria ihismorim enselahos sheyotu sherssharih enyudok debeinyi wagitur nyani amudok 24-poreim debeimi hani eshudok nubatish dodogowishi douk mishish shoreh iri shabuh shaduk ohrubus hurukatinyum enyudok debeinyi wagitur aria shape shenek lotu um Iruhin. ¹²Shakri,

“Adur atin! Apak manadudareh um apakin Iruhin aria matuk ananin nyeigur nyato iruhw aria makri anan yopuyopuni. Aria apak ta munek tenkyuman ihih nyumneh. Aria debeinyi nyeigur nyuni yopipi urkwip puni saki iri dodog ta shupe abom um anan atun ihih nyumneh. Adur atin!”

Arudok Eriger Douk Eshudok Arpesh Shemnegor Iri Douk Ratu

¹³Aria anan um amudok 24-poreim debeimi narige nakri, “Eshudok arpesh shor rouhi shigorihiwihi rupeh iri douk meishi? Eshesh shanaki meigunum iri?”

¹⁴Aria eik yakripan yakri, “Debeini, nyak kanak douk nyadukemesh, eik uwok.” Aria anan nakripe nakri, “Eshudok arpesh seiwok shape agundok atap aria eshudok douk shakanuk agabus Iruhin iri shenekesh shemnek debeiri eriger. Aria eshesh shakwrup esheshih rupeh Nugaen Sipsip enyenyibor owishibor aria hatogur shigorihiwi. ¹⁵Douk namudok aria eshesh douk sheyotu hurukatin um Iruhin ananin yopunyi wagitur. Aria nyumneh weibus eshesh shape shenek ananin mour numun ananit debeiti urupat. Aria anudok douk nape enyudok wagitur iri ta nini eshesh nupe aria nutaurumesh. ¹⁶Aria nyurub ta mare wata besh atin aria abar

shopunek ta mare besh atin, uwok. Aria debeihi wah shopunek ta mare wata hutao hesh shumnek debeiri eriger, uwok. ¹⁷Um maresh? Nugaen Sipsip douk nyeyotu orokohun hurukatin um debeinyi wagitur iri ta nyupe nyutaurumesh wosik kabi anudok nataurum sipsip wosik iri um. Aria enyen ta nyuraesh shunak shuwok abrudok abar douk ta shubaroh aria bunekesh shupe wosik abom ihih nyumneh iri. Ababar douk bakih atap meyoh bor iri. Aria Iruhin ta nubatikumesh ihihmorim abih aria eshesh ta mare wata shureh atin, uwok.”

Nugaen Sipsip Nyabahigeshuk Namba 7 Kendelis Gris Soweshik Buk Iri

8 ¹Douk Nugaen Sipsip nyabahigeshuk namba 7 kendelis gris douk soweshik okwudok buk shadareshok iri gani iruhw heven. Aria madae enesh eshudok shiyagwreh o shubirak uwe, uwok. Ihishmorim eshudok shape mukareg banab nyutob hurukatin um tukwanin aua. ²Aria yatigu eshudok 7-poreish enselahos douk sheyotuwu hurukatin um Iruhin iri sharao 7-poreiruh aruruh.

³Aria kupainyi ensel nyasuhw anas dis douk shenekas gol iri um shure paura douk shashainyeh nyenek nyugus seisik wosik iri um. Enyen nyasuhw asudok dis aria nyanaki nyeyotu hurukatin um alta douk showem eshudok shenek ofamesh shako Iruhin iri um. Aria sheken sabainyi paura um nyinyanuh um ihishmorim Iruhin ananish arpeshe esheshin beten douk shape shenekan iri. Aria nyeshem enyudok alta douk sheneken iri nyatao hurukatin um debeinyi wagitur iri aria nyenek ofamesh um Iruhin. ⁴Aria nyih hanu enyudok paura douk enyudok ensel nyasuwen enyenyis wis iri aria nyugus sani Iruhin ananish arpeshe esheshin beten shakitak shato um agundok Iruhin napeum. ⁵Aria enyudok ensel nyasuhw asudok dis enyudok paura nyor um aria nyanak hurukatin um enyudok alta aria nyonik nyih nyehur dis shukunis aria nyawasheh hagruki agundok atap. Douk enyen nyawasheh hagruki aria utag brerayarog gatrugun abom aria geyagwreh debeg aria debeikwi enyik kwatuk.

Nubatish Enselahos Shahapurish Aruruh

⁶Aria eshudok 7-poreish enselahos shasuhw 7-poreiruh aruruh iri shenek redi um shahapururuh. ⁷Aria nyarik iri ensel nyahapurish enyenyihw oruhw aria shigorihwisi ais douk dodogowis kabi utabor-umori sani nyih douk shenenek um owishibor iri shagruki agundok atap. Aria shasiya agundok atap nani rowos um biwotuk outumeb. Aria ehudok nyih hanu onok outuk aria hanu ihigos-morim rowos iri wishap heyateshuk. Aria bio outumeb wapeik, nyih madae hunu uwe.

⁸Aria nyagiguk iri ensel nyahapurish enyenyihw oruhw aria shawashak enen enyudok kabi douk onohw debeihwi nyih hanuhw iri

yoduhw hwagrukuk youg. Aria shasiyauk youg um biwotuk outumeb aria onok outuk youg gwanenem um owishibor. ⁹Aria shasiya ihishmorim eshudok eneshenesh shape youg iri um bibatun lainab aria anan lain shagok shatuh. Aria shopunek, shasiya ihiyumorim kruruhiyor douk wor youg iri um bibatun lainab aria anan lain yoweu abom gririgaro watuh.

¹⁰Aria binyatin iri ensel nyahapurish enenyihw oruhw aria onok takweikwi unuk douk hanuk nyih jorarehok kabi hanu arkirub um aria kwakutukuk iruhw aria kwanatuk kwagruki agundok atap. Aria shadareh ihibusmorim worubus um bibatun lainab aria okwudok unuk kwagrukuk kwabo anan lain um worubus sani ihibarmorim abar douk bakih atap meyoh iri. ¹¹Aria anan lain senenem um nubutibari abar. Aria sabaishi arpesh shawok abrudok abar aria baesh shagok shatuh. Nyeigurik um okwudok unuk douk Nubutini Marasin.

¹²Aria nubatin iri ensel nyahapurish enenyihw oruhw aria shasiya nyumnahin nani wabin aub bani ihiyumorim unib um biwotuk outumeb. Aria eshesh shanunu onok outuk um anudok nyumnahin aun nani onok outuk um wabin aun aria onok outuk um oudok unib aria shatogur arukwutigunish. Aria shatupak nyumnah um bibatin nyutob aria wab um bibatin. Douk namudok aria nyumnah biyab nyutob batrugun um aria anob nyutob arukwutigun. Aria wab shopunek namudok atin, biyab nyutob wanyukeh aria anob nyutob arukwutigun.

¹³Aria yatrugunugu aria yatigu anar debeiri armir kabi douk kumun um rehuru ranak iruhw. Aria yemnek um arar reyagwreh debeg rakri, “Gihaumesh arpesh shape agundok atap iri. Um maresh? Hurukatin um eshudok bishatin enselahos ta shihapurish esheshiruh aruruh aria enenyenen amaen ta nyutogur um eshudok atapishi arpesh aria ta nyunekesh shunamnek debeiri eriger.”

Anas Wisin Ensel Nyahapurish Enenyihw Oruhw

9 ¹Douk anas wisin ensel nyahapurish enenyihw oruhw aria yatik onok unuk kwanatuki kwakutukuk iruhw kwagruki jurug agundok atap. Okwudok unuk douk shakok enyudok ki um agudok nuwag douk gagor gabuhuk gani atap aria atapig um madae gubuh giyotu anabik iri uwe. ²Aria abudok nyutob enyen nyejik agudok nuwag obi nyutob, sabaigwusi nyugwus sakih sato abom kabi douk debeih nyih hanu um. Aria agwusudok nyugwus sato aria sakih seyawiyamuk nyumnahin aun aria aun nani iruhw shopunek arukwutigun abom. ³Aria sabaishi eshudok kabi douk debeishi gormish um iri shakutukuk ogwusudok nyugwus shagruki agundok atap. Eshesh douk sharao dodog aria wanohwish kabi douk pupiyak um. ⁴Aria Iruhin nakripesh um eshesh mare shubo wishap puni eneshenesh douk shatogur agundok atap aria shuni rowos shugok, uwok. Eshesh ta shubo eshudok arpesh douk

madae shurao Iruhin ananin kak nyupe esheshis domaesh iri uwe atish shunekesh shumnek debeiri eriger.

⁵Aria eshudok kabi douk gormish um iri shape shanatuk eshudok arpesh um anas wisib aub. Aria eshesh shape shemnek debeiri eriger kabi douk pupiyagwihiyar wanatukesh shemnek um. Aria eshesh madae shurao dodog um shubo eshudok arpesh shugok uwe, uwok. ⁶Aria abudok nyutob eshesh ta shurim yeh um shugok um. Aria shopunek, eshesh ta shukri abom um shugok um atin aria ta uwok. Gok ta nyuruwok-umeshuk.

⁷Aria yatik eshudok gormish shape kabi douk hwasahos um shape shenek redi um shunak um wanohw. Esheshigos baragos douk enesh eshudok kabi douk yopugwi hatog shenekog gol iri gwatem um aria esheshigos yamagos sape kabi arpeshigos um. ⁸Aria esheshigos baragos sape kabi armago-wigos um. Aria esheshiruh naruh hape kabi enen debeinyi wanohwinyi mahin nyeigurin um laion iri enenyiruh hapeum. ⁹Aria mishish um, eshesh shor onog siotog douk dodogowig kabi douk ainab um. Aria esheshish kapraigiyohos shenekoh iri mah douk kabi hwasahos shanuk sabaishi wilkarahos shahur shanak um wanohw iri shenekoh iri mah. ¹⁰Aria esheshis honus sape kabi douk pupiyagwihiyar um aria sanatuk arpesh. Aria esheshin dodog douk nyape asudok honus um sunatuk eshudok arpesh um abudok anas wisib aub. ¹¹Aria eshesh douk enyudok ensel, douk nyasuhw merik um agudok nuwag douk gagor gabuh gani atap iri nyape debeinyi king um eshesh nyasuhw merikwumesh. Enyudok ensel enenyin nyeigur douk shahwaren eshesh Hibru esheshin barauen um douk shakri, “Abadon.” Aria eshesh Grik esheshin shakri, “Apollyon.” Aria apak ta mukri “Anudok arman douk nape nanunu ihish eneshenesh iri.”

¹²Eneshenesh sagramatinyish eshudok douk shenek arpesh shemnek debeiri eriger iri douk shatogur shanak shatuh douk. Aria pumnek, biyesh yoweishi abom kabi douk enyudok nyarik iri douk wata shape, aria eshesh ta shugiguk shutogur.

Anawipin Ensel Nyahapurish Enenyihw Oruhw

¹³Aria anawipin iri ensel nyahapurish enenyihw oruhw aria eik yemnek anah mah. Enyudok arpen douk nyeyagwrehi gani anagas um nubatin kona um enyudok alta douk sheneken gol iri. Enyudok alta showem eshudok shenek ofa shako Iruhin um, enyen douk nyatao hurukatin um Iruhin napeum. ¹⁴Aria enyudok nyeyagwrehi iri nyakrip enyudok anawipin ensel nyasuhw oruhw iri nyakri, “Nyak nyukweshih eshudok nubatish enselahos douk shonoweshik shape abudok debeibi worub nyeiguribum Yufretis iri shunak wosik!”

¹⁵Aria enyen nyakweshih-esh aria eshesh shasiya ihishmorim arpesh shape agundok atap iri um bisatup awiros. Aria eshesh shabo anap

awirop um eshudok arpesh shagok. Eshudok enselahos eshesh douk Iruhin nenekesh shenek garibog abom shapeum abudok atub nyutob, ahudok atuh nyumnah, anudok atun aun aria enyudok atin kwar um eshesh shunek enyudok mour. ¹⁶Aria eik yemnek shadareh amudok soldia douk hatem hwsahos aria hanak henek wanohw iri um douk sabaimi abom hatogur 200 milion.

¹⁷Aria eik kabi douk yabo yomnis um aria yatik amudok soldia hatem hwsahos iri hore siotog douk shenekog ainab iri um amamish mishish. Agwudok siotog onog douk owishiborig kabi douk nyih hanu um. Aria onog behrabig, aria onog akitohig kabi douk amudok utom nyeigurim um salfa iri. Aria hwsahos esheshigos baragos sape kabi enesh debeishi wanohwishi mahish nyeigurish um laion iri esheshigos um. Aria nyugwus sani nyih douk hanuwi amudok akitohimi utom nyeigurim um salfa iri shatograri eshudok hwsahos esheshig nokwatog. ¹⁸Aria eshesh shasiya ihishmorim arpesh um bisatin awiros aria eshesh shabo anap awiropish arpesh shagok. Eshesh douk eshudok bishatin yoweishi abom eshudok, nyih, nyugwus aria ehudok juwehosihi nyih douk hanuwi amudok utom salfa iri douk shatograri hwsahos esheshig nokwatog iri shaesh shagok. ¹⁹Eshudok hwsahos esheshin dodog douk nyape esheshig nokwatog gwani honus. Esheshis honus douk sape kabi yuguhw um, aria baragos sapenyesh. Aria eshesh shakwu esheshis honus um shabo arpesh shenekesh sharao debeiri eriger.

²⁰Aria ihishmorim shapeik iri arpesh douk madae shugok abudok nyutob eshudok yoweishi shatogruresh abom um obi nyutob, eshesh madae shukutukuk yoweishi inahos uwe, uwok. Eshesh madae shukehuk agabus ehudok aih um shape shenek lotu um sagabehos shani amudok madae adurimi god omi um uwe, uwok. Amudok god omi douk eshesh kanak shenekam esheshis wis iri. Eshesh shenekam shakwu gol rani siliwa iri akitohinyi kapa douk shahwaren um bras iri nyani utabor bani rowos iri. Amam douk madae hutrugun o humnek o hurahaen iri uwe. ²¹Aria shopunek, eshesh madae shukehuk agabus ehudok yoweih aih um shabo kupaishi shakwumesh eshudok eneshenesh aria shaesh shagok um uwe, shani ehudok um shenek ouruh um, shani enyudok um shenek enenyenen um subagwiruh um, nyani enyudok um shape shenek wehrur um, nyani enyudok um shakwuaruh um uwe, uwok. Eshesh madae shukutinyukuk aria shatanam shukon aparuh Iruhin uwe.

Ensel Nyakon Buk Jon Nakwoh

10 ¹Enyudok nyanak nyatuhuk aria eik yatigu enen kupainyi dodogowinyi ensel nyakutukuk iruhw heven nyabuhi. Orug gweyor-gwarih enenyihw yegenyihw. Aria enen renbo nyato iruhw aria enenyir yamuger rakah rananug, ratem iruhw enenyig barag.

Aria enyenyig yamag gatrugun kabi douk wah hatao hatrugunuk um. Aria enyenyigas aiyas sape kabi douk nyih hanu jurareh iri um. ²Aria enyen nyasuhw onok shokukwi buk douk shadareshok iri enyenyis wis. Okwudok buk douk kwanejik kwape aria enyen nyasuhwok. Enyenyig yopugi aiyag nyagur gor youg, aria anag nyeshishuk amnab. ³Aria enyen nyogao aria nyahwar debeg kabi enen debeinyi wanohwinyi mahin nyeigurinyum laion iri nyahwar um. Enyen nyahwar jurug aria utag pogarog 7-poreih. Aria utag geyagwreh kabi douk arpenyih mah um. ⁴Douk utag geyagwreh 7-poreih jurug, aria eik yenek redi um yakri iwem enyudok baraen um anap shup. Aria eik yemnek anah mah hanaki iruhw heven. Aria enyudok nyeyagwrehi iri nyakri, “Enyudok baraen douk utag geyagwreh 7-poreih gakriyen iri, nyak mare nyunyem, uwok. Enyudok baraen nyumneken nyupe um nyak atin!” ⁵Aria enyudok ensel douk yatrin nyeyotu youg gwani amnab iri nyatuk enyenyin yopunyi rogur nyato iruhw. ⁶Aria enyen nyakri iruhw um anudok douk nape ihih nyumneh iri ananin nyeigur. Anan douk nenek iruhw atap nani ihishmorim eneshenesh eshudok douk shape iruhw atap iri. Aria shopunek, nenek youg gwani eneshenesh shape shakam-igum iri.

Aria enyen nyakri, “Nyutob batuh, aria Iruhin ta mare nukri nusuhwesh nupe, uwok.” ⁷Aria enyudok ensel wata shopunek nyakri, “Abudok nyutob douk namba 7 ensel nyahapurish enyenyihw oruhw obi nyutob, eshudok douk seiwok Iruhin nabeshukesh iri ta shunowereh nunekesh shutogur yopugunum. Anan ta nunekesh shutogur yopugunum kabi douk seiwok anan nakripuk amam profet douk henek ananin mour iri um.”

⁸Aria eik wata yemnek ahudok atuh mah. Aria enyudok arpen douk iganigadae yemneken nyeyagwreh iruhw heven iri wata shopunek nyakripe nyakri, “Nyak nyunak nyutrin okwudok buk douk kwanajik kwor enyudok ensel douk nyeshish youg gwani amnab iri enyenyis wis iri.”

⁹Aria eik yanak yarigen um nyuke apudok shokwupi shup shadareshap iri. Aria enyen nyakripe nyakri, “Nyak suwap aria nyupoh. Nyupoh pur nokwat um, apap ta ekehip kabi douk araruh um. Aria pubuh pur apahw um ta nyumnek nubut.” ¹⁰Aria eik yatrinyap aria yapoh. Aria yapoh por nokwat um, eik yemnek ekehip kabi douk araruh um. Aria yapoh pabuh por apahw um, apap wata nubutip. ¹¹Aria yemnek enen arpen nyakripe nyakri, “Nyak ta nyukriresh enyudok baraen Iruhin nakripen-enyi shopunek. Enyudok baraen douk nyakrium eshudok douk ta kweipon shutogurum sabaishi arpesh douk shape ihigosmorim nahobigos douk sape agundok atap iri. Eshesh shuni sabaishi sisigiruh yegeshiweruh-ish arpesh shuni sabaishi shenyagwreh kupainyi baraen iri, shuni sabaimi king-omi.”

Biom Armam Hakripesh Yopinyi Baraen Iri

11 ¹Aria enyudok ensel nyeke enen rowog douk shape shasuhw wigah um eshudok eneshenesh iri aria nyakripe nyakri, “Nyak kakitak suh wigah um Iruhin ananit urupatⁱ tuni alta douk showem um eshudok shenek ofamesh shako Iruhin iri um. Aria shopunek, nyudareh ihishmorim arpesh douk shape shenek lotu numun ananit urupat iri. ²Aria arbudok narub douk bapeik adukehahitam agundok wit um atudok urupat iri nyak mare nyusuhw wigahumat, uwok. Um maresh? Arbudok narub Iruhin nako eshudok arpesh douk madae shudukem Iruhin iri uwe. Aria eshesh ta shushish Iruhin ananibur yopuburi wabur Jerusalem shupeum um 42-poreib aub. Abudok 42-poreib aub douk shopunek atin um bishatin shuknish aria enen tukwanin kwarahos. ³Aria eik Iruhin ta ishopok eikim biom armam inekam dodogowim atum hunak hukripesh eikin yopinyi baraen. Amam ta hur yoweih i rupeh kabi douk yoweigosi begos^j um. Eik ta ikripam eikin baraen aria amam ta hunak hukripeshen 1,260-poreih nyumneh. Ehudok 1,260-poreih nyumneh douk shopunek atin um bishatin shuknish aria enen tukwanin kwarahos.” ⁴Amudok biom armam amam douk shakri wobuwobren baraen um eshudok biyesh rowos nyeiguhwish um oliv iri shani biyesh eshudok douk showem lamhos shetem um douk shakus hurukatin um Debeini douk nasuhw ihibmorim amnab iri. ⁵Aria ta enesh arpesh shukri shom o shuham um, nyih ta hutograri amamig nokwatog aria hunu amamish horim hiyatesh. Douk namudok aria meishi arpesh shukri shom o shunekam mumam iri, eshesh ta mare shuruwok, uwok. Eshesh shopunek ta ehudok nyih hunish aria shugok shutuh. ⁶Amudok biom douk harao big aria dodog um hunek eshah mare hurauri abudok nyutob amam hukripesh Iruhin ananin baraen obi nyutob um. Aria shopunek, amam douk dodogowim um hunek ihibarmorim abar douk bakih atap meyoh iri buni bor worubus sani youg iri um bunenek um owishibor. Aria amam douk dodogowim um hunek eneshenesh yoweishi abom eshudok shutogurum ihishmorim arpesh shunekesh shurao debeiri eriger. Aria douk meibi nyutob amam hukri hunekesh namudok um, amam ta hugipesh amamip atip urkwip. ⁷Douk kweipon amam ta hukripesh Iruhin ananin baraen hiyaten aria enyudok debeinyi wanohwinyi mahin ta nyukutukuk agudok nuwag douk gagor gabuhuk gani atap iri nyutowi. Enyen ta nyutowi aria nyuto iruhw nyuni amudok biom armam shurpak aria enyen ta dodogowin atin nyom

ⁱ 11:1 Atudok Iruhin ananit urupat douk takri um Iruhin ananish arpesh. ^j 11:3 Amudok biom profet hagipesh esheshih aih hore yoweigosi begos sanahwaram um rupeh um huyabigesh um amam hakri uwok abom um eneshenesh yoweishi inahos eshesh shenekesh iri aria hape hereh.

hugok. ⁸Aria amam ta hucusuk abrudok debeiburi wabur ababih debeih
yah douk seiwok shabo amamin Debeini showeshikan shanaur neir rowog
kruse nagok aburi. Abrudok wabur ababish biyesh wobresh nyeiguhw douk
Sodom iri Isip. ⁹Aria bihotih shuknih anah tukwanih nyumneh, sabaishi
arpesh shanaki ihismorim awiros douk shape ihigos-morim nahobigos
agundok atap iri ta shutrum. Eshesh douk sisigiruh yegeshiweruh-ish douk
sheneyagwreh sabainyi kupainyi baraen iri. Aria eshesh ta mare shukri
wosik um enesh arpesh shumuhur shunak shurumam, uwok. ¹⁰Aria shape
agundok atap iri arpesh ta shunadudareh um agundok amudok biom
hagok um. Eshesh ta shunadudareh aria shupe shukesh yopinyi presen
um esheshish atin atin arpesh. Um maresh? Amudok biom wata hapeum,
amam apa henek sabaishi arpesh shape agundok atap iri shemnek debeiri
eriger. ¹¹Douk bihotih shuknih anah tukwanih nyumneh hunak hudiguk,
aria ta Iruhin ananip yap wata panak pawisham aria amam ta wata
hukitak hiyotu. Aria arpesh ta shutrum aria shunogugur abom. ¹²Aria
abudok nyutob, amudok biom ta humnek anah mah. Aria enyudok arpen
nyiyagwrehi iruhw heven iri ta nyukripam debeg nyukri, “Ipak putowi
agundok iruhw!” Aria amamish horim ta shiyotu shupe shutrum meyoh
aria amam ta huwish onog orug aria hupe huto um iruhw heven.

¹³Aria ta abudok atub nyutob abom, takweikwi enyik ta kwutuk
aria sabaishi 7,000-poreish arpesh ta shugok. Aria agundok onok outuk
abrudok wabur ta buwishuk aria 9-poreiyu outumeb upeik. Aria eshudok
douk shupeik iri ta shutik namudok aria eshesh ta shunogugur abom aria
ta shupe shutuk Iruhin douk nape iruhw heven iri ananin nyeigur nyuto
iruhw. ¹⁴Eshudok biyesh yoweishi abom douk shenek arpesh shemnek
debeiri eriger iri douk eshudok shatuh. Aria ipak pumnek! Douk ta mare
roubi nyutob aria eshudok bishatin yoweishi abom douk ta shunek arpesh
shunumnek debeiri eriger iri ta shutogur.

Namba 7 Ensel Nyahapurish Enyenyihw Oruhw

¹⁵Douk namba 7 ensel nyahapurish enyenyihw oruhw aria enesh
arpesh sheyagwrehi debeg iruhw heven iri shakri,

“Amudok douk riguk hape debeimi king um agundok atap iri
amamih nyumneh douk hatuh.

Douk abudok nyutob apakin Debeini nani Kraiss,
anudok douk Iruhin nagraehan neshopokan nanaki iri douk
hatogur dodogowim atum um hupe king um agundok atap.

Aria Kraiss ta nupe Debeini nupe nusuhw merik um agundok atap
ihih nyumneh.”

¹⁶Aria amudok 24-poreim debeimi douk hetem amamish debeishi
wagiturahos hurukatin um Iruhin iri habuh hakus atap aria hape henek
lotu um Iruhin. ¹⁷Aria hakri,

“Debeini dodogowini Iruhin douk seiwok nyape
aria douk shopunek nyape!
Apak manadudareh-umen aria menek tenkyumen.
Um maresh? Nyak douk nyarao nyakin debeinyi dodog
aria douk nyananubur nyape king um ihishmorim arpesh
shani eneshenesh eshudok.

¹⁸ Eshudok douk madae shudukemesh um nyak iri uwe,
eshesh juwehosish aria agundok nyak juwehosin um douk natogur.
Aria ahudok nyumnah douk hatogur um shagok iri
wata shukitaki aria nyak nyusuhw esheshig kwotog um.
Aria shopunek um nyukom yopishi eshudok eneshenesh
um amam profet.

Amam huni ihishmorim nyakish arpesh nyeiguhw shato-umesh iri
shuni nyeiguhw wokeshi douk shanogugur um nyak aria shenek
lotumen iri.

Aria um nyununu eshudok arpesh douk
shape shanunu abudok amnab iri!”

¹⁹ Douk amudok 24-poreim debeimi hakriyuk namudok jurug aria
Iruhin ananit debeiti urupat tatao iruhw heven iri tanajik. Aria asudok
bogis douk dodogowinyi barae kontrak Iruhin nakrip eshesh Israel
enyi nyor um sakusi yopugunum gani numun urupat. Aria utag pogarog
geyagwreh aria gatrugun abom. Aria eik yemnek anah debeihi mah. Aria
enyik kwatuk aria sabaisi debeisi shigorihwisi ais kabi douk utabor-umori
sagruki atap.

Armatok Kwani Debeiri Yur

12 ¹ Aria shatik um enen dodogowinyi abom kak um shutrin aria
shudukemesh shukri enen dodogowinyi arpen hurukatin um
nyutogur. Enyudok kak nyanakwarum nyatogur nyape iruhw heven.
Aria nyatograri iri kak douk enyudok. Onok armatok kwape aria
okwok kwashok nyumnahin aun kabi douk rupah um. Aria wabin nape
shakameruh um okwokwiruh yeriweruh. Aria kowem anat yoputi hat
douk 12-poreiyu unib wapenyat iri kabi douk debeiwori otu wogwem
iri um okwokwig barag. ² Aria okwok douk kwonarahaen aria kwape
kwabirak um kwakri kwubanuh aria kwareh kwahwar debeg. ³ Aria
wata shopunek, kupainyi dodogowinyi kak nyanakwarum nyatogur
nyape iruhw heven. Aria nyatograri douk enyudok. Enen dedebeinyi
owishiborinyi mahin kabi douk anar takweiri yur um nyanakwarum
nyatogur nyape. Enyen 7-poreigos baragos seiren aria 10-poreiruh
shuworuh hakihen barag. Aria 7-poreig yopugwi hatog douk debeimi
atum hogwem iri gwatem atug atug um enenyigos baragos. ⁴ Aria enyen
nyakwu enenyip honup nyogat unib douk wape atugun um onok outuk

iri gani iruhw utag aria nyawasho wagrुकuki atap. Aria bio outumeb um unib wapeik iruhw utag. Aria enyen nyanak nyeyotu apahwik um okwudok armatok douk hurukatin um kubuki batowin iri um nyakri kadak okwok kwunyubuki atin aria enyen arigas nyunyuhur nyunyoh. ⁵Aria okwok kwabanuh kwabuki armanin batowin. Anudok arman kweipon ta nupe dogogowin atun aria ta nusuhw ainim butum aria nupe debeini um ihishmorim arpesh douk shape ihigos-morim nahobigos iri. Douk okwok kwanabuki aria eshesh shatrुकwan sharan shanak um Iruhin um ananin debeinyi yopunyi wagitur douk anan napenyen iri. ⁶Aria okwok kwaruwok kwanak um anabik wehigunum arpesh uwok um. Okwok kwanak um agundok douk Iruhin nenekagun-umok um kwunak kwupeum. Aria agundok eshesh ta shupe shutaurumok kwupe 1,260-poreih nyumneh. Ehudok 1,260-poreih nyumneh douk shopunek atin um bishatin shuknish aria enen tukwanin kwarahos.

⁷Aria debeihwi wanohw hwatogur iruhw heven. Enyudok debeini Iruhin ananin ensel douk nyanahwar um Maikel iri nyani enyenyish enselahos shabo arudok debeiri yur. Aria arudok yur shopunek rani ararish yoweishi enselahos wata shatanam shawanam wanohw. ⁸Douk eshesh sharpak aria yur rani ararish enselahos madae dogogowish uwe. Aria eshesh madae anabik uwe um shupe iruhw heven um. ⁹Aria Iruhin ananish enselahos shasuhwesh shawashesh shabuhi atap. Arudok yur douk seiwok rape aria douk shopunek rape iri. Arar douk shahwaror um yoweini sagaben o Satan. Anan douk nape nenek rohwh um ihishmorim arpesh douk shape agundok atap iri. Anan nani ananish yoweishi enselahos, eshesh douk showashesh shagruki agundok atap.

¹⁰Aria eik yemnek anah debeihi mah. Aria enyudok arpen nyeyagwrehi debeihi mah gani iruhw heven iri nyakri,

“Douk agundok um Iruhin narap
 matanamori mape wosik um douk nanaki.
 Aria Iruhin neyabigap um anan douk dogogowini abom
 aria ta nupe king um apak ihih nyumneh!
 Aria douk Krai, Iruhin nagraehan
 aria neshopokan nanakumori nurao arpesh iri douk
 neyabigap um anan douk dogogowini
 aria ananin big nyatogur deben.
 Um maresh? Arudok yur douk reyotu rape renekumesh rohwin
 baraen eshesh Kristen,
 rakrip apakin Iruhin nyumnah wab
 rakri eshesh shenek yoweih aih iri arar douk
 Iruhin ananish enselahos shawashor
 rakutukuk iruhw heven ragruki agundok atap.

¹¹ Aria apakish ashukenyish owashish douk shagipesh Krai iri

shenek uhwinyumor.

Um maresh? Eshesh shape dodogowish um

enyudok Nugaen Sipsip douk

seiwok shaen nyagok iri enyenyibor owishibor

bani enyenyin adurin baraen douk eshesh shakripeshen iri.

Esheship urkwip douk por abom um shakri

shukripesh enyudok adurin baraen

aria eshesh madae urkwip purum shukri

shupe wosik agundok atap um uwe.

Aria shopunek, eshesh madae shunogugur um kupaishi arpesh douk

shakon agabus Iruhin iri shesh shugok um uwe.

¹² Douk namudok aria ipak pape iruhw heven iri puni iruhw utag, ipak ta punadudareh.

Aria ipak pape atap pani youg iri eik yakri giha-umep,

ipak ta pumnek debeiri eriger.

Um maresh? Satan douk nagrुकुगु um ipak.

Aria anan douk juwehosin abom. Um maresh?

Anan nadukemesh um anan nupe nurahaen obi nyutob douk banab abom meyo.”

¹³ Aria douk arudok debeiri yur ratik um eshesh shawashor ragruki agundok atap um, aria arar rape rahiyah okwudok armatok douk

kwabanuh kwabuki nuganin iri. ¹⁴ Aria eshesh shokok biyesh debeishi

kumunish kapraigiyohos um kwehuru. Aria okwok kwanadudareh

kwanak gani wehigunum arpesh uwok um. Okwok kwanak agundok

um eshesh shupe shutaurumok eshudok bishatin shuknish aria enen

tukwanin kwarahos um arudok yur mare rok. ¹⁵ Aria sabaibari abar

batograri ararit nokwat aria batogur banak. Ababar bagipeshok banak

kabi douk worub batogur banak um. Um arar rakri kadak abrudok abar

bunak aria buraok bunak bok kwugok. ¹⁶ Aria amnab bataurumok. Aria

amnab puwarob banak tukwotukwan aria abrudok abar bagrukuk atap.

¹⁷⁻¹⁸ Aria arar juwehosir abom um okwudok armatok aria ranak um rakri

runi ihishmorim okwokwish batowish aria barheshish shurpak. Eshesh

douk eshudok ihishmorim arpesh douk shagipesh Iruhin ananin lo aria

shakripesh Jisas ananin adurin atinyi baraen aria shagipeshen iri.

13 ¹ Aria arar ranak reyotu anagas um youg.

Biyesh Debeishi Wanarish Mahish

Aria eik yatigu enen debeinyi mahin nyape urah iri nyakutukuk youg

nyakitak nyape nyatowi. Enyen 10-poreiruh shuworuh hakihen aria

7-poreigos baragos seiren. Aria 10-poreig yopugwi hatog douk debeimi

atum hogwem iri gwatem otuhw otuhw um arhudok shuworuh. Aria

enen yoweinyi nyeigur nyetem enyudok mahin enyenyigos baragos.

Baugenyum baraen um enyudok nyeigur douk shabubunim um Iruhin. ²Enyudok mahin douk nyape kabi enen debeinyi wanohwinyi mahin douk shahwaren um lepat iri. Aria enenyigas aiyas sape kabi enen debeinyi wanohwinyi mahin shahwaren um bea iri. Aria enenyit nokwat kabi douk enyudok debeinyi wanohwinyi mahin douk nyanahwar um laion iri enenyit um. Aria arudok yur reken ararin dodog aria big nyani ararin debeinyi yopunyi wagitur um enyudok debeinyi mahin. ³Aria anag um enyudok mahin enenyig barag, takweibi arab bapenyag kabi douk shaen nyagok um. Aria enyen douk madae nyugok uwe, uwok. Abab wata banakawis. Douk namudok aria ihishmorim arpesh shape agundok atap iri shakitak yowiyokuk um enyudok mahin aria shagipeshen. ⁴Aria arudok yur douk reken ararin big um enyudok mahin. Douk namudok aria ihishmorim arpesh shenek lotu um arudok yur. Aria eshesh shenek lotu um enyudok mahin shopunek shakri, “Arpen douk madae enen dodogowin kabi douk enyudok mahin um uwe, uwok. Enyen atin douk dodogowin abom. Aria ta omi dodogowin um nyuni enyen shurpak?”

⁵Aria Iruhin nakri wosik nape natrin meyoh enyudok mahin um enyen nyupe debeinyi um sabaishi arpesh um 42-poreib aub. Abudok 42-poreib aub douk shopunek atin um bishatin shuknish aria enen tukwanin kwarahos. Aria enyen nyape nyeyagwreh enenyenen yoweinyi abom baraen aria nyape nyatuk enenyin nyeigur nyato iruhw. ⁶Aria enyen nyanonubur nyape nyabubunim um Iruhin. Enyen nyabubunim um ananin nyeigur nyani ananibur wabur bani eshudok arpesh douk shape iruhw heven iri. ⁷Aria Iruhin neken dodog aria enyen nyani Iruhin ananish arpesh sharpak aria enyen nyaesh nyahiyahesh. Aria enyen nyarao debeinyi big um nyupe king um ihishmorim arpesh shape ihigos-morim nahobigos iri. Shuni ihismorim debeisi awirosish, shuni ihishmorim sheneyagwreh ihin kupainyi baraen iri, shuni ihishmorim ihiruh sisigiruh yegeshiweruhish arpesh. ⁸Aria ihishmorim arpesh douk shape agundok atap iri ta shunek lotu um enyudok mahin. Ihishmorim eshudok arpesh douk seiwok Iruhin madae nunek agundok atap uwe, aria anan madae nuwem um esheshish nyeiguhw shutem okwudok buk douk eshudok arpesh ta shupe wosik ihih nyumneh iri esheshish nyeiguhw shutemokwi. Okwudok buk douk enyudok Nugaen Sipsip douk seiwok shaen nyagok iri enenyik. ⁹Aria douk ipak arigos sapenyep iri um, ta gamo pumnek enyudok baraen!

¹⁰Eshudok arpesh douk Iruhin nukri wosik um kupaishi shusuhwesh shuweshikesh shuraesh um shunuweshik iri, eshesh ta shunuweshik.

Aria eshudok douk Iruhin nukri wosik um kupaishi shukwumesh bainatog iri, eshesh ta shukwumesh bainatog aria shesh shugok.

Adur atin, enyudok kweipon ta nyutogur.
 Namudok aria ipak Iruhin ananish arpesh ta pusuhw ananin baraan
 dodog pugipeshen aria piyotu dodogowip atip abudok nyutob
 enyudokmori amaen nyutogrumep um.

¹¹Aria eik yatigu enen kupainyi debeinyi wanarin mahin shopunek.
 Enyen douk nyape iri gani atap nuwag iri nyakitak nyapa nyatowi.
 Enyen bioruh shuworuh kabi douk hatogur nugaen sipsip iri hakih
 baragenyum. Aria enyen nyeyagwreh kabi douk yuguhw hweyagwreh
 um. ¹²Aria enyen nyakwu enyudok nyarik iri mahin enyenyin big aria
 dodog um nyupe debeinyi um ihishmorim arpesh. Aria shopunek um
 nyupe dodogowin atin aria nyunek agundok atap nini ihishmorim arpesh
 shunek lotu um enyudok nyarik iri mahin douk takweiti nyubrut tape
 anag enyenyig barag kabi douk shaen nyagok iri um. Aria enyen madae
 nyugok uwe, uwok. Aria abab banakawis. ¹³Enyudok nyagiguk iri mahin
 nyenek enen mour douk Iruhin atun neneken iri agundok nabesish um
 ihishmorim arpesh. Enyen nyeneken iri douk enyudok. Enyen nyenek
 nyih hakutukuk iruhw heven hagruki agundok atap. ¹⁴Aria Iruhin nakri
 wosik aria enyen nyenek sabainyi Iruhin atun neneken iri mour agundok
 nabesin um enyudok nyarik iri mahin. Douk enyen nyenekesh namudok
 aria enyen nyape nyenek rohwa um ihishmorim arpesh shape agundok
 atap iri. Aria enyen nyape dodogowin atin aria nyakripesh um shunek
 enyudok nyarik iri mahin enyenyir aborir aria shupe shutuk enyenyin
 nyeigur nyuto iruhw. Enyen douk seiwok shaen shakwumen bainat aria
 enyen madae nyugok iri uwe. Enyen wata nyape. ¹⁵Aria Iruhin nakri
 wosik aria enyudok nyagiguk iri mahin nyahapurish enyenyip yap pawish
 enyudok nyarik iri mahin enyenyir aborir douk eshesh shenigor iri aria
 nyorukar yapis. Enyen nyenekar namudok um riyagwreh aria runek
 eshudok arpesh douk shakri uwok um shunek lotumar iri shugok. ¹⁶Aria
 enyen dodogowin atin abom um nyakri ihishmorim arpesh, nyeiguhw
 shato-umesh iri,^k shuni nyeiguhw wokeshi, shuni shanagrem sabaishi
 eshudok eneshenesh iri, shuni yaruhish iri, shuni shape shakamum
 kupaishi shenekumesh mour meyoh iri, shuni shape wosik iri um shurao
 enen kak nyupe esheshish domaesh o esheshish yopishi roguhwa. ¹⁷Enyen
 nyenekesh namudok um meinyi arpen douk mare nyurao enyudok kak o
 enyudok namba iri, enyen ta mare nyutor eshudok eneshenesh o nyunek
 salimesh um kupaishi shutorish, uwok. Enyudok namba o kak douk
 nyakri wobuwobren baraan um enyudok mahin enyenyin nyeigur.

¹⁸Apak ta murao saki um mudukemesh um baugenyum baraan um
 enyudok namba. Enyudok arpen douk nyudukemesh abom iri enyen ta
 nyudukemesh um baugenyum baraan um enyudok namba. Um maresh?

^k 13:16 Putik futnot nyape Revelesen 11:18 iri.

Enyudok namba douk nyakrium anan arman ananin nyeigur. Aria enyudok namba douk 666.

Sabaishi 144,000-poreish Arpesh Sheyarub Onohw Namuhwi Awehw

14 ¹Aria eik Jon wata yatrugunugu aria yatigu nugaen Sipsip nyeyotu ahwudok yoduhw douk shahwarohw um Saion iri. Enyen nyani sabaishi 144,000-poreish armam armago douk enyudok Nugaen Sipsip nyani enyenyin Yain amamish nyeiguhw shetem esheshish domaesh iri sheyotu. ²Aria eik yemnek anah mah hanaki iruhw heven kabi douk debeibi worub batogur debeg um. Aria shopunek, ahah kabi douk utag pogarog debeg um. Ahudok mah eik yemnekah iri ahah douk kabi yopuhi mah douk shabirak eshudok kabi gitahas um iri shabirakesh shenekah iri. ³Aria eshudok sabaishi 144,000-poreish arpesh sheyotu hurukatin um Iruhin ananin debeinyi wagitur nyani amam debeimi hani eshudok nubatish dogowishi douk mishish shoresh iri shapeum. Aria eshesh sheyarub onohw namuhwi awehw douk eshesh Jisas Kraish nagraehesh aria naraesh shakutukuk agundok atap iri atish shadukemohw iri. ⁴Anam armam um eshudok arpesh douk henek yopinyi atin iri. Enesh douk armam henek yopishi inahos atin iri. Amam madae hunek yoweihi aih um huni armago shenek wehrur atin uwe, uwok. Amam hape yopumi armam. Aria hagipesh Nugaen Sipsip hanak ihigunum enyen nyanak um. Aria orokohun um eshudok arpesh shape agundok atap iri, Iruhin nator amudok harik iri armam naram hanakum anan nani Nugaen Sipsip kabi douk ofa um. ⁵Amam madae enen baraan nyupenyam um henek eneh yoweihi aih um uwe. Aria shopunek, amam madae hunek rohwa atin uwe, uwok.

Iruhin Ananish Bishatin Enselahos Sheneyagwreh Shakri Enen Baraan

⁶Aria eik yatik enen ensel nyehwuru nyanak gani iruhw iri nyasuhw Iruhin ananin yopinyi baraan douk ta nyupe ihih nyumneh iri um nyukrip ihishmorim arpesh shape agundok atap iri. Enyen ta nyukrip ihiruhmorim sisigiruh yegeshiweruhish arpesh, shuni ihishmorim sisigis awirosish arpesh, shuni ihishmorim sheneyagwreh kupainyi baraan iri, shuni ihishmorim arpesh douk shape ihigosmorim nahobigos iri. ⁷Aria enyen nyahwar debeg nyakri, “Nyutob banaki um Iruhin anudok debeini jas um nunek skelimum ihishmorim arpesh um. Namudok aria ipak punogugur um anan aria putuk ananin nyeigur nyuto iruhw! Ipak punek lotu um Iruhin douk nenek iruhw heven nani agundok atap nani youg gwani ihibarmorim abar douk batogur atap meyoh iri.” ⁸Aria nyagiguk iri nyehwuru nyanaki aria nyakri, “Abrudok debeiburi wabur nyeigur nyato iruhw aburi Babilon bananukuk jurug! Adur abatur bananukuk iyoh! Arpesh shape Babilon iri riguk shenek ihishmorim

arpesh shape ihigos-morim nahobigos iri shenek wehrur um aria shenek eneheneh yoweih iah. Eshesh shenek ehudok yoweih iah kabi douk eshesh shape Babilon iri shekesh dodogowibari wainibar abar shaboroh shagugak aria shenekeh iri um.”⁹⁻¹⁰ Aria enyudok binyatin iri ensel douk nyagipesh eshudok biyesh sharik iri enselahos iri nyahwar debeg nyakri, “Thishmorim arpesh douk shenek lotu um enyudok debeinyi mahin nyani enyenyir aborir aria sharao enyenyin kak nyape esheshish domaesh o esheshish roguhw iri ta shuwok anan kupaini wain. Anudok wain douk nakri wobuwobren baraen um agundok Iruhin anan juwehosin um douk ta nunekesh shumnek debeiri eriger iri. Aria anan ta mare nukri nenek gihamesh, uwok. Anan ta juwehosin-umesh abom aria nunekesh shumnek debeiri eriger um nuwanamesh eneshenesh yoweishi inahos eshesh shape shenekesh iri. Aria Iruhin ananish enselahos shuni Nugaen Sipsip ta shiyotu shutrish aria eshesh ta debeih nyih hunish. Ehudok nyih douk hanuwi anab akitohibi amnab nyeigurib um salfa iri. ¹¹ Aria nyugus douk sakih ehudok nyih douk hanu eshudok arpesh shemnek debeiri eriger iri ta sukih suto ihih nyumneh. Aria eshudok arpesh douk shenek lotu um enyudok debeinyi mahin nyani enyenyir aborir aria sharao enyenyin kak douk nyakrium enyenyin nyeigur iri, nyumneh weibus eshesh ta mare shupe um shurao uhwin, uwok. Eshesh ta shupe um shumnek debeiri eriger namudok atin.”

¹² Namudok aria Iruhin ananishi arpesh douk shagipesh ananin lo aria shenek bilip dodogowish atish um Jisas iri, eshesh ta shiyotu dodogowish atish abudok nyutob eshesh shumnek debeiri eriger obi nyutob um.

¹³ Aria yemneku anah mah. Aria enyudok arpen nyeyagwrehi iruhw heven iri nyakri, “Nyak wem enyudok baraen anap shup um eshudok douk shasuhwen dodog Debeini ananin baraen shagipeshen iri. Baraen enyudok, ‘Eshudok douk shatukur Debeini aria shugok shunak iri shuni eshudok douk ta kweipon shugok iri, eshesh ta shupe wosik aria ta shunududareh!’ ”

Aria Iruhin ananin Mishin shopunek nyakri, “Adur, eshesh ta shukutukuk ihinyumorim debeinyi mour eshesh shape sheneken iri aria ta wata shupe um shurao uhwin shupe meyoh. Um maresh? Eshesh ta mare shunak meyoh, uwok. Ehudok yopihi aih aria mour eshesh shape sheneken iri ta nyunamesh nyunak. Aria Iruhin ta nukesh enesh yopishi eshudok eneshenesh um ehudok aih aria mour eshesh sheneken iri.”

Shaurimori Worigun Agundok Atap Um

¹⁴ Aria wata shopunek yatrugunugu aria yatik onog shigorihwigwi orug. Aria enen arpen nyetemori ogwudok orug. Enyen nyape kabi “Anudok Arman douk natogur adurinyi arpen iri.” Anan nowem anat yoputi hat shenekat um gol iri douk debeimi atum hogwem iri amamigos

baragos. Aria nasuhw anap wanohwip atupi ponodaresh iri nogwotep ananis wis. ¹⁵Aria kupainyi ensel nyatograri atudok Iruhin ananit debeiti urupat aria nyahwaran debeg anudok natem ogwudok orug iri nyakri, “Nyak nyukwu nopudok nogwotep nyurimori worigun. Um maresh? Ahudok nyumnah um worigun nunourimori um agundok atap um douk hatogur.”

¹⁶Aria anudok arman natem ogwudok orug iri nawashak ananip nogwotep pabuhi agundok atap aria nabre ihigunmorim worigun.

¹⁷Aria kupainyi ensel nyatograri atudok Iruhin ananit debeiti urupat gani iruhw heven. Aria enyen shopunek nyasuhw anap wanohwip atupi ponodaresh iri nogwotep. ¹⁸Aria enen kupainyi ensel shopunek douk nyape nyasuhw merik um nyih iri nyatograri gani enyudok alta douk showem eshudok shako Iruhin iri um nyakus um. Aria enyen nyahwaren debeg enyudok douk nyasuhw wanohwipi nogwotep iri nyakri, “Nyak nyukwu nyakip nogwotep nyubre epudok wainip shuruwep douk peir anaruh madururuh douk hanahwar um wain iri um agundok atap. Um maresh? Epep douk buwarep!” ¹⁹Aria enyudok ensel nyawashak enyenyip nogwotep pabuhi um agundok atap aria nyabre epudok ihipmorim shuruwep. Aria nyepuhur nyanak nyowashep pabuhuk anag debeigi tenk douk shenekag utabor iri um shumakwiyeshep aria shunek wainibar abar. Enyudok wobuwobren baraen douk nyakrium agundok Iruhin anan juwehosin um eshudok arpesh douk shape shenek yoweih aih iri. ²⁰Aria anudok wain eshesh shanak shamakwiyeshan agudok tenk adukehahibur um abrudok debeiburi wabur. Aria sabaibori owishibor douk batograri adukehahig um agudok tenk iri bawori banak rougun wosik um 300 kilomita. Aria abrudok sabaibori owishibor hurigasarubor bato um douk wosik hurukatin um 2 mita. Enyudok wobuwobren baraen douk nyakrium agundok Iruhin anan juwehosin um eshudok arpesh douk shape shenek yoweih aih iri.

Iruhin Ananish 7-poreish Enselahos Shasuhw Eshudok Douk Shenek Arpesh Shemnek Debeiri Eriger Um

15 ¹Aria eik wata shopunek yatik kupainyi debeinyi kak nyatogur iruhw heven. Enyen douk nyatogur um nyiyabig arpesh um agundok douk Iruhin dodogowin um nini agundok anan juwehosin um eshudok yoweishi inahos arpesh shenekesh iri um. Aria eik yape yanasorik um enyudok kak. Kak douk enyudok. Eik yatik 7-poreish Iruhin ananish enselahos douk shasuhw 7-poreish shagiguk abom iri eshudok eneshenesh um shunek arpesh shumnek debeiri eriger iri. Eshudok yoweishi eneshenesh, eshesh douk shagiguk abom iri. Um maresh? Abudok nyutob ta shubo eshudok arpesh douk shape agundok atap iri ba iyoh, aria agundok Iruhin anan juwehosin abom um ta nutuh.

²Aria eik yatik enen enyudok douk nyape kabi youg-mori um. Enyen nyape kabi wenyir, douk sheneger rani nyih iri. Aria shopunek, eik yatik enesh arpesh sheyotu anagas um youg. Eshudok arpesh eshesh douk sheyotu dodogowish shenek uhwinyum wanohw shabo enyudok debeinyi mahin iri. Aria shopunek, eshesh shenek uhwinyum enyenyir aborir rani namba douk nyakri wobuwobren barauen um enyenyin nyeigur iri. Aria eshesh shasuhw eshudok kabi gitahas um douk Iruhin nekeshesh iri.

³Aria eshesh shape sheyarub ahwudok awehw douk nenek Iruhin ananin mour iri Moses nani Nugaen Sipsip amamihw. Ahwudok awehw douk sheyarub shakri namudok,

“Debeini Iruhin, nyak douk dodogowinyi abom
aria nyabo ihishmorim eneshenesh shabuhuk iri.

Nyakh aih douk yopiyopihi abom.

Aria nyakin mour douk dodogowinyi abom

aria arpesh shatrin aria mishish shakitak yowiyokuk!

Nyak nyape King um ihigos-morim nahobigos douk
sape agundok atap iri.

Aria nyak nyenekeh iri aih aria mour douk adurin atin abom!

⁴Debeini, ta omi mare nyunogugur um nyunek lotumen?

Aria ta omi nyukri uwok um

nyutuk nyakin debeinyi nyeigur nyuto iruhw?

Nyak atin yopunyi abom.

Aria ihishmorim arpesh shape ihigos-morim nahobigos iri
ta shunaki shunek lotu um nyak atin.

Um maresh? Nyakin ihinyumorim yopinyi mour iri aih douk
shatogur yopugunum.”

⁵Douk enyudok nyanakuk aria yatigu atudok Iruhin ananit debeiti urupat gani iruhw heven tanajik. Aria eik yatigu numunitum atudok selit urupat douk Iruhin napenyot iri. ⁶Aria Iruhin ananish 7-poreish enelahos douk shasuhw 7-poreish yoweishi eshudok eneshenesh iri shakitak shatograri atudok urupat. Eshudok yoweishi douk ta shunek arpesh shumnek debeiri eriger iri. Eshesh shorari yopihi atih hatrugun iri shigorihwihi rupeh. Aria shawashak iri letog douk shenekog gol iri um esheshish mishish. ⁷Aria enen um eshudok nubatish dodogowishi douk mishish shoresh iri nyekesh 7-poreis dis douk shenekas gol iri um eshudok enelahos. Asudok dis douk shishuknis um Iruhin douk nape ihih nyumneh iri um anan juwehosin um. ⁸Aria atudok Iruhin ananit debeiti urupat shuknit um ogwusudok yopugwusi nyugwus douk satograri agundok douk Iruhin dodogowin aria natrugun abom um. Aria abudok nyutob, madae enen arpen ta dodogowin um nyunak nyuwish um uwe, uwok. Enyen ta nyupe arigaha eshudok 7-poreish enelahos shiyatak enyudok mour um eshudok 7-poreish yoweishi douk shenek arpesh

shemnek debeiri eriger iri ba iyoh, aria enyen wosik ta kadak nyunak nyuwish.

**7-poreis Dis Douk Shukunis Um Eshudok Douk
Iruhin Juwehosin-umesh Abom Um**

16 ¹Aria eik yemnek anah mah. Aria enen arpen nyeyagwrehi atudok Iruhin ananit debeiti urupat. Aria enyudok nyeyagwrehi iri nyakrip eshudok 7-poreish enselahos debeg nyakri, “Ipak punak purak Iruhin anan juwehosin um nyor ipakis dis iri nyubuhukuk atap!”

²Aria nyarik iri ensel nyanak nyourak eshudok shor enyenyis dis iri shabuhukuk atap. Aria takwetakweibi yoweibi ereb batogur um enesh arpesh. Ebeb douk batogur um ihishmorim douk sharao enyudok debeinyi mahin enyenyin kak nyape esheshish roguh w shani domaesh aria shenek lotu um enyenyir aborir iri. ³Aria nyagiguk iri ensel nyaurak eshudok shor enyenyis dis iri shabuhukuk youg aria youg gwatanam gwanenem um owishibor kabi douk shagok iri arpesh esheshibor um. Aria ihishmorim eshudok shape youg iri shagok. ⁴Aria binyatin iri ensel nyaurak eshudok shor enyenyis dis iri shabuhukuk worubus aria ihibarmorim abar douk batogur atap meyoh iri batanam banenem um owishibor atubor. ⁵Aria eik yemnek enyudok ensel douk nyasuhw merik um ihibarmorim abar iri nyakri, “Nyak adurinyi. Seiwok baugos abom um nyak nyape, aria douk shopunek nyape.

Baraen nyak nyeneken um eshudok arpesh douk shenek yoweishi inahos iri douk yopin abom. Eshesh shemnek debeiri eriger wosik um yoweishi inahos eshesh shenekesh iri.

⁶Um maresh? Eshesh shabo nyakish arpesh shani amam profet douk Iruhin nakripam baraen hakrip arpesh iri shagok aria esheshibor owishibor batourak.

Aria ahudok nyumnah douk nyak nyuwanam-umesh eshudok shenek yoweishi inahos iri shaboroh. Abrudok owishibor douk bakri wobuwobren baraen um arudok debeiri eriger douk Iruhin nenekesh shemnegor iri. Aria arar douk renekesh-umesh wosik um eshudok yoweishi inahos eshesh shape shenekesh iri.”

⁷Aria eik yemneku enen arpen nyeyagwrehi enyudok alta douk shape showem eshudok shenek ofamesh shako Iruhin iri nyataoum. Aria enyudok arpen nyeyagwrehi iri nyakri,

“Debeini, nyak douk Dodogowini abom Iruhin.

Nyak nyeneken um arpesh iri baraen douk yopin abom!”

⁸Aria enyudok nubatin iri ensel nyaurak eshudok shor enyenyis dis iri um nyumnahin aun. Aria Iruhin nakri wosik aria wah hatao juwehosih

atuh habo arpesah aria nyih hanish. ⁹Aria ahudok wah hatao juwehosih atuh abom aria habo enesh arpesah aria shanomnek abom um debeih nyih hanishuk. Aria eshesh shape shahao Iruhin shabubuniman anan douk nasuhw merik um eshudok yoweishi douk shenek arpesah shemnek debeiri eriger iri. Aria eshesh shakri uwok abom um shatanam shukon aparuh Iruhin aria shutuk ananin nyeigur nyuto iruhw um. ¹⁰Aria enyudok anas wisin iri ensel nyaurak eshudok shor enyenyis dis iri shanak um enyudok debeinyi mahin nyapenyen iri wagitur nyakus um. Aria wab babuh beyawiyamuk agundok ihishmorim arpesah douk enyen nyasuhw merikw-umesh iri shapeum. Eshesh shapeum arukwutigun abom. Aria eshesh shemnek debeiri eriger aria sabaibi ereb bapenyesh aria shape shanatuk esheship yehep. ¹¹Aria shape shabubunim Iruhin douk nape iruhw heven iri. Aria eshesh madae shukehuk agabus ehudok yoweih aih eshesh shape shenekeh iri uwe, aria shatanam shukon aparuh Iruhin uwe, uwok.

¹²Aria enyudok anawipin iri ensel nyaurak eshudok shor enyenyis dis iri um abudok debeibi worub nyeiguribum Yufretis iri. Aria abar bogerukuk abom um shugabemam yah amam king-omi douk ta hunaki gani aun nakihumori. ¹³Aria eik yatigu bishatin shanabosusih iri yoweishi sagabehos douk shape kabi makihos um. Eshesh shatograri arudok debeiri yur rani enyudok debeinyi mahin shani anudok nenek rohbumesh iri profet esheshig nokwatog. ¹⁴Eshesh douk bishatin eshudok yoweishi abom sagabehos douk shape shenek enyenyenen mour kabi douk Iruhin atun nape neneken iri. Aria eshudok bishatin iri yoweishi sagabehos ta shunak shurauri ihim-morim king douk hape ihigunum um agundok atap iri um hunaki hupe atugun aria huni dodogowini Iruhin douk nasuhw ihinyumorim dodog iri hurpak ahudok ananah debeih nyumnah.

¹⁵Aria Jisas Kraiss nakri, “Ipak mnek, eik ta wata inaku itogrump kabi douk nakwuaruh iri nanakumogu. Douk namudok aria eshudok arpesah douk mare shishuh aria shugabe shunabuk esheshih rupeh wosik iri, eshesh ta shunadudareh shupe wosik. Um maresh? Eshesh ta mare shugar shupe shurahaen shunak yopugunum aria abraen nyesh, uwok!”

¹⁶Aria eshudok yoweishi sagabehos sharauri amudok debeimi king hanaki hape agundok douk baraen Hibiru shahwaragun um Amagedon iri.

¹⁷Aria namba 7 ensel nyaurak eshudok shor enyenyis dis iri shanak um utag. Aria eik yemnek anah mah. Enyudok arpen nyeyagwrehi numun Iruhin ananit debeiti urupat douk Iruhin ananin yopunyi wagitur nyakus um. Aria enyudok arpen nyeyagwrehi iri nyahwar debeg nyakri, “Douk eshudok shatuh!” ¹⁸Aria utag pogarog geyagwreh debeg aria gatrugun abom. Aria debeikwi enyik kwatuk. Douk seiwok agundok atap arpesah

shape shanaki arigaha douk aria madae onok okudokmori debeikwi enyik kwutuk uwe! ¹⁹Aria abrudok debeiburi wabur banasiya um bihatuh-igunum. Aria ihirubmorim debeirubi warub bape ihigos-morim nahobigos agundok atap iri bananukuk. Aria Iruhin urkum morum eshesh shape abrudok debeiburi wabur Babilon iri aria nekesh anudok wain douk shakri wobuwobren baraen um anan juwehosin abom um aria shanoh. ²⁰Aria ihishmorim unaihos shani ihiruhmorim yodururuh burukwadesh-ukuk aria shanak shawishuk abom. ²¹Aria shigorihwisi ais kabi douk utabor um sagruki iruhw utag kabi douk eshah harari um aria sabuhi saesh. Abrudok aisibor utabor douk amaenyibor abom. Ababor atum atum douk 50 kilogram. Aria douk enyudok yoweinyi abom um abrudok aisibor utabor babuhi baesh shemnek debeiri eriger um nyenekesh aria shape shabubunim um Iruhin. Um maresh? Enyen douk yoweinyi abom.

**Debeikwi Armatok Douk Kwani Kupaimi Shenek
Wehrur Iri Kwomnek Debeiri Eriger**

17 ¹Aria enen um eshudok 7-poreish enselahos douk shasuhw asudok 7-poreis dis douk shuknis um Iruhin anan juwehosin-umesh abom um nyanakumori eik aria nyakripe nyakri, “Nyak yowi aria iyabigen um agundok ta okwudok debeikwi armatok douk kwani kupaimi shenek wehrur iri kwumnek debeiri eriger um okwokwih yoweih aih um. Okwok douk kwape hurukatin um sabaibusi debeibusi worubus. ²Aria king omi¹ douk hape agundok atap iri hani okwok shenek wehrur um. Aria sabaishi arpesh shape agundok atap iri shawok okwokwin wain aria shagugak. Anudok wain douk shakri wobuwobren baraen um okwokwih yoweih aih.”

³Aria Iruhin ananin mishin nyatogrume dodogowin atin. Aria enyudok ensel nyarae nyanak anagun wehigunum arpesh uwok um. Aria agundok eik yatik onok armatok kwatem iruhw um enen debeinyi owishiborinyi wanarin mahin. Enyudok mahin 7-poreigos baragos seiren aria 10-poreiruh shuworuh hakihen. Aria sabaishi nyeiguhw shatem ihihwmorim enenyihw yegenyihw. Eshudok nyeiguhw douk shabubunim um Iruhin. ⁴Aria okwudok armatok kwenek biyeh yomogih owishiborihi rupeh. Okwok kwanaginohw okwokwihw yegenyihw um sabaibi yamayamagib batrugun iri weiyoub douk shenekab gol iri. Aria shopunek, anab douk shenekab anabor yopubori utabor bani anab weiyoub douk shatorub debeibori utabor iri. Aria kwasuhw anap kap

¹ 17:2 Enyudok baraen um king-omi hani okwudok armatok shenek yowesh inahos um douk nyakrium agundok arpesh shakutukuk Iruhin shanak shenek lotu um madae adurimi god omi um uwe.

shenekap gol iri okwokwis wis. Aria eneheneh yoweih aih douk Iruhin nakri wokumeh abom iri hani eneheneh yoweih aih um shani okwudok armatok shenek wehrur um hor apudok kap shuknip. ⁵Aria okwokwin domaen enen nyeigur nyetem. Baugenyum baraen um enyudok nyeigur douk nyanabeshuk. Enyudok baraen douk nyakri namudok,

“Nyeigur nyuto-umaburi wabur Babilon baugos abom um ihiyumorim armago douk wape wani kupaimi shenek wehrur um wani ihihmorim yoweih abraenyih aih douk agundok atapishi arpesh shape shenekeh iri.”
⁶Aria eik yatik okwudok armatok kwape kwabo sabaishi Iruhin ananish arpesh douk shenek bilip dodogowish atish um Jisas aria shakripesh ananin baraen kupaishi iri. Okwok kwaesh shagok aria kwogugak abom kabi douk kwawok esheshibor sabaibori owishibor aria kwogugak um. Aria douk yatiguk namudok aria eik mishin nyakitak yowiyokuk. ⁷Aria enyudok ensel nyarige nyakri, “Nyak mishin nyakitak yowiyokuk um maresh? Eik ta ikripen um baugenyum baraen um enyudok nyanabeshuk iri baraen um okwudok armatok kwuni enyudok debeinyi wanarin mahin douk okwok kwatemen kurahenyen iri. Enyen douk 7-poreigos baragos seiren aria 10-poreiruh shuworuh hakihen iri. ⁸Enyudok nyatrin iri mahin douk seiwok nyape aria douk madae nyugok. Aria enyen ta nyukutukuk agudok nuwag douk gagor gabuhuk gani atap abom iri nyuto iruhw aria ta nyunak nyuwishuk.

Aria onok buk kwakus. Okwok douk eshudok arpesh douk ta shupe wosik atin ihih nyumneh iri esheshish nyeiguhw shetemokwi. Aria enesh arpesh douk seiwok Iruhin wata nunek agundok atap uwe, aria madae nuwem esheshish nyeiguhw okwudok buk iri uwe ta shutik enyudok mahin aria ta shukitak yowiyokuk. Um maresh? Seiwok enyen nyape aria douk uwok, enyen nyagok. Aria anah nyumnah enyen ta wata nyukitak nyupe.

⁹Aria meinyi arpen douk nyadukemesh abom iri enyen wosik ta nyudukemesh um baugenyum baraen um okwudok armatok kwani enyudok debeinyi mahin. Agusudok 7-poreigos baragos sape enyudok mahin iri douk shakri wobuwobren baraen um 7-poreiruh yodururuh douk okwudok armatok kwatemaruh iri. Aria shopunek, agagos douk shakri wobuwobren baraen um 7-poreim king-omi. ¹⁰Amam 5-poreim douk hagok, aria anan douk wata nape dodogowini king. Aria anan wata nutogur nupe king uwe. Aria anan ta nutogur aria ta nupe banab meyoh nyutob. ¹¹Aria enyudok debeinyi mahin douk seiwok nyape aria douk madae enen nyupe iri uwe, enyen douk shakri wobuwobren baraen um anan king douk natogur nape nani amudok anam 7-poreim aria hatogur 8-poreim iri. Aria anan ta wata nunak nuwishuk abom.

¹²Aria aruhudok 10-poreiruh shuworuh nyak nyatruruh iri douk shakri wobuwobren baraen um 10-poreim king-omi douk wata hutogur

hupe debeimi iri uwe. Amam ta hurao debeinyi big um hupe king-omi huni enyudok mahin. Aria eshesh ta shupe debeishi banab nyutob, atin aua meyoh. ¹³Aria amudok 10-poreim king ihim-morim hasuhw atin baraan. Amam hakri hupe dodogowim aria huken amamin debeinyi big nyuni dodog enyudok debeinyi mahin um ihishmorim arpes shumnek enyenyin baraan shugipeshen. ¹⁴Aria amam king-omi huni enyudok mahin ta shuni Nugaen Sipsip nyuni enyenyish armam armago shurpak. Aria Nugaen Sipsip nyuni enyenyishi douk enyen nyagraehesh aria nyahwresh shasuhw enyenyin baraan sheyotu dodogowish atish iri ta shubo amudok king huni enyudok mahin shihyahesh. Um maresh? Enyudok Nugaen Sipsip douk Debeinyi abom um ihim-morim debeimi aria nyape king abom um ihim-morim king. ¹⁵Aria enyudok ensel wata shopunek nyakripe nyakri, “Abusdok worubus nyak nyatik okwudok yoweikwi armatok kwapenyabus iri douk shakri wobuwobren baraan um sabaishi arpes. Eshudok arpes douk shape sabaigosi nahobigos iri. Eshesh douk sisigiruh yegeshiweruh aria sheneyagwreh sabainyi kupainyi baraan iri. ¹⁶Aria aruhudok 10-poreiruh shuworuh nyak nyatruruh iri huni enyudok debeinyi mahin ta juwehosin um okwudok yoweikwi armatok. Aria eshesh ta shok kwugok aria shutruk shuwaruk owokwih rupeh aria okwok ta kwugor kwupe aria kwukus. Aria eshesh ta shupe shutah eibug-ikwum shugwoh aria okwok ta shukuhur shukweh nyih aria hunuk hiyatokuk. ¹⁷Um maresh? Eshesh douk Iruhin neshuhur um shugipesh ananim atum urkum. Namudok aria anan nakri wosik um amam husuhw atin baraan aria enyudok amamin dodog douk amam haraan um hupe king iri um ta wata huko enyudok mahin. Aria enyen ta nyupe dodogowini king arigaha abudok nyutob Iruhin ananin baraan nyutogur adurin abom obi nyutob butogur. ¹⁸Aria okwudok armatok nyak nyatrak iri douk shakri wobuwobren baraan um abrudok debeiburi wabur. Ababur douk bape kabi anan debeini nyeigur nyato iruh-uman iri arman douk nape debeini um ihim-morim king hape agundok atap iri um.

Debeiburi Wabur Babilon Bananukuk Jurug

18 ¹Douk enyudok nyanakuk aria eik yatigu kupainyi ensel nyakutukuk iruhw heven nyabui. Enyen douk nyarao debeinyi big aria enyenyih rupeh hatrugun abom aria ihigunum agundok atap gor nakusuk. ²Aria enyen nyahwar debeg nyakri, “Abrudok wabur Babilon nyeigur nyato iruhw aburi douk bananukuk jurug! Ababur bananukuk! Aria douk ababur batogur yoweiburi wabur um eshudok ihishmorim sagabehos shuni warehos shuni ogwuhudok yoweiguhwi hwanabosusih abom iri armiguhw hwupeum.

- 3 Um maresh? Sabaishi arpeshe shape ihigos-morim nahobigos iri shawok okwokwibar wainibar abar.
 Abrudok abar douk shakri wobuwobren baraen um okwokwih yoweih aih um shani okwok shenek wehrur um.
 Eshesh douk shatik arpeshe shape Babilon iri esheshih yoweih aih aria shagipeshesh shenekeh.
 Aria amudok ihim-morim king hape agundok atap iri hani abrudok waburishi arpeshe shenek wehrur um.
 Aria eshudok douk shenek bisnis agundok atap iri sharao debeibori utabor um ehudok yoweih aih douk eshudok shape abrudok wabur iri shape shenekeh iri.”
- 4 Aria eik yemnek kupaihi mah gani iruhw heven. Aria enyudok nyeyagwrehi iri nyakri,
 “Ipak eikishi arpeshe, ipak pukutukuk abrudok wabur aria putogrukuk um mare puni
 abrudok waburishi arpeshe punek eshudok yoweishi inahos eshesh shape shenekesh iri.
 Ipak pukutubur-ukuk um ipak mare punnek debeiri eriger douk ta eshesh shumnekar iri.
- 5 Um maresh? Eneshenesh yoweishi inahos eshesh shape shenekesh iri douk sabaishi abom shape kabi waripak kwagit nyubuhaw kwoshem um.
 Aria eshesh shakus shato gani iruhw heven
 aria Iruhin natrish aria anan urkum moromesh.
- 6 Ipak padukemesh eshudok eneshenesh yoweishi inahos okwok kwape kwenekesh iri douk sabaishi abom.
 Douk namudok aria ipak ta pushanom-umok wosik atin okwokwish yoweishi inahos aria peshopokesh shutoumuk.
 Okwok kwabadig nubutibari abar bor kap aria ipak pabarah.
 Douk namudok aria ipak wata pubodig nubutibari abar namudok atin aria pukok kwubarah um kwumnek arudokmori atin debeiri eriger okwok kwenek ipak pemnekar iri.
 Aria pushopokor rutoumuk shopunek.
- 7 Okwok douk kwatuk okwokwin nyeigur nyato iruhw aria kwenek eneshenesh yoweishi inahos douk okwok mishin nyakitak um kwunekesh iri.
 Aria okwok nyeigur nyato iruhw kworao debeinyi amaen wosikumok um eshudok yoweishi inahos douk riguk okwok kwape kwenekesh iri.
 Aria okwok numun nanagunukuk aria kwakri,
 ‘Eik yape debeikwi kwini!

Eik kabi douk raminen madae nugokuk uwe um.
 Aria eik ta mare enen amaen nyutogrume aria nyuneke ireh.
 Adur atin ta uwok!'

⁸ Douk namudok aria atuh nyumnah meyoh
 sabaishi yoweishi abom eshudok ta shutogurum abrudok wabur.
 Eshudok yoweishi inahos douk eshudok.
 Eneheneh yoweih arugeh ta hutogrumesh aria ta shureh debeg.
 Aria debeirubi nyurub ta besh aria nyih shopunek ta hunish.
 Um maresh? Debeini Iruhin apa nenek skelumesh
 aria nawanamesh eneshenesh yoweishi inahos
 eshesh shenekesh iri douk dodogowini abom.

⁹ "Aria amudok king hape agundok atap iri hani okwudok armatok
 shenek wehrur um aria shenek sabaishi eneshenesh yoweishi shopunek.
 Aria amam ta hutiku nyih hunuk aria nyugus supe sukih aria amam ta
 hurepok yowiyokuk. ¹⁰ Amam ta hunogugur abom um arudok debeiri
 eriger douk okwok kwemnekor iri aria ta hiyotu rougun aria hupe hukri,
 'O giha-mobur abrudok nyeigur nyato iruhw maburi wabur Babilon!
 Giha-umep ipak arpesh pape abrudok dodogowiburi wabur iri! Douk
 banab nyutob, atin aua meyoh
 aria ipak pemnek debeiri eriger jurug um
 eneshenesh yoweishi inahos ipak pape penekesh iri! "

¹¹ "Aria eshudok arpesh douk shape shenek bisnis agundok atap iri ta
 urkwip purum abrudok wabur aria esheshiruh aparuh ta yoweruh aria
 shupe shureh. Um maresh? Ta mare wata enesh kupaishi arpesh shutor
 anah esheshih jah, uwok. ¹² Ta mare enesh arpesh shutor ahudokmori
 jah. Gol iri siliwa, shuni yopubori utabor, buni yopubi abom weiyoub
 douk shatarub debeibori utabor iri. Shuni yopihi abom shigorihiwihi
 rupeh huni eneh biyag yomogih owishiborihi rupeh, huni eneh yopihi
 abom wogeruhihi rupeh. Huni ihigosmorim rowos douk seisik yopuri
 unar wosik iri, suni ihishmorim eshudok douk shenekesh enen mahin
 douk shahwaren um elefan iri enenyiruh naruh iri. Shuni eshudok douk
 shenekesh agusudok rowos douk shatoragos debeibori utabor iri, shuni
 eshudok douk shenekesh enen akitohinyi kapa nyeigurinum bras iri.
 Shuni eshudok douk shenekesh ainab iri, shuni eshudok yopishi abom
 douk shenekesh anabor yopubori utabor iri. ¹³ Eshudok shuni ahudokmori
 jah shopunek. Enyudok shanyoh iri rowog sinamon, nyuni enesh eshudok
 kabi douk yabro um, shuni enesh eshudok douk sheshesh sheisik wosik
 iri. Shuni enyudok yopinyi sanda douk shahwaren um mer iri, shuni anas
 gris douk shahwaras um frankinsens iri. Eshudok shuni wain iri arudok
 sharah iri wel, shuni sabainyi abom plaua, shuni wit douk kabi douk rais
 um. Shuni bulmakauhos iri sipsip iri hwsahos shuni wilkarahos, shuni
 arpesh douk wata shape sharahaen iri. Eshudok douk shape shakamum

kupaishi shenekumesh mour meyoh iri. Eshudok ihishmorim shuni arpesh^m ta mare wata shutorish atin, uwok.

¹⁴“Aria eshudok douk shenek bisnis iri ta shukripok namudok shukri, ‘Eshudok eneshenesh ihishmorim douk nyak mishin nyakitakumesh um nyuraesh iri douk shanak shawishuk. Aria nyakish yopishi eshudok douk shatorish debeibori utabor iri shani eneshenesh yopishi eshudok douk shatrugun abom iri shopunek douk shanak shawishuk. Aria nyak ta mare wata nyutrish atin!’ ¹⁵Aria eshudok douk shenek bisnis um shonakam um eneshenesh eshudok aria shatorish sabaibori utabor eshudok arpesh shape abrudok wabur Babilon iri ta shunogugur abom um arudok debeiri eriger douk ta abrudok waburishi arpesh shumnekar iri. Aria eshesh ta shunak shiyotuwu rougun aria ta shupe shurepobur. ¹⁶Aria ta shukri,

‘O giha mobur atubur abrudok nyeigur
nyato iruhw mobur iri wabur!

Seiwok ababur bananek yopihi abom shigorihiwihi rupeh hani
sabaishi owishiborihi rupeh shopunek.

Aria banaginohw gol rani yopubori abom utabor
bani weiyoub douk shatorish debeibori utabor iri!

Eshudok eshesh douk shatrugun abom iri.

¹⁷Aria wata shopunek banab meyoh nyutob, atin aua meyoh
aria ihishmorim eneshenesh eshudok douk
shatorish debeibori utabor iri wata shanak shawishuk.’”

“Aria sabaishi hasuhw bodaeg kruruhiyor douk wahur youg iri
hani sabaishi pasindia douk shator kruruhiyor aria sharahaen shanak
kupairubi warub iri, hani amudok henek mour kruruhiyor iri, shani
ihishmorim arpesh douk apa shenek esheshin mour youg iri eshesh
ihishmorim ta shiyotuwu rougun um abrudok wabur Babilon. ¹⁸Aria
abudok nyutob ta shiyotu shutik wabur nyih hunubur aria nyugwus
sukitak suto obi nyutob, eshesh ta shukri, ‘Douk madae anabur wabur
bape agundok atap iri bupe kabi abrudok nyeigur nyato iruhw aburi
wabur um uwe, uwok meyoh!’ ¹⁹Aria eshesh ta shuhur nyupruk”
shunuwatom baragos aria ta shupe shureh debeg shukri,

‘O giha-mobur atubur abrudok wabur!

Eshudok ihishmorim arpesh douk shogrem kruruhiyor iri
sharao sabaibori utabor abrudok wabur.

Ipak pakri giha mobur abrudok wabur. Um maresh?

^m 18:13 Enesh arpesh shape shakamum kupaishi shenekumesh mour meyoh iri. Kupaishi arpesh apa shatorish utabor kabi douk apak mator enesh eshudok shakus stuahas iri um.

ⁿ 18:19 Enyudok baraen um shunuwatom nyupruk barag um douk sheneken um shakri shiyabigesh um esheshiruh aparuh yoweruh abom um agundok abrudok wabur bananukuk um.

Douk banab nyutob, atin aua meyoh abrudok waburish
ihishmorim eneshenesh yopishi eshudok shanak shawishuk!

20 Aria ipak enselahos pape iruhw heven iri
puni ipak Iruhin ananish arpes, h
puni ipak aposel douk Iruhin nagraehep um
punak pukriפש ananin barae iri,
puni ipak profet douk pakriפש
Iruhin nakriפש-enyi barae iri,
ipak ihishmorim ta punadudareh.
Um maresh? Iruhin nenek kwotimabur
aria nawanamobur yoweishi inahos abrudok wabur
aria bemnek debeiri eriger um agundok
seiwok ababur barik benek ipak pemnek debeiri eriger um.’ ”

21 Douk enyudok barae nyanak nyatuhuk aria eik yatik enen
dodogowinyi abom ensel nyohur onok debeikwi burbuduk^o nyawashok
kwagrukuk youg aria nyakri,

“Ta shuwashak abrudok debeiburi wabur Babilon bugrukuk debeg
atin gani atap

kabi eik yawashok okwudok burbuduk kwagrukuk um.

Aria arpes ta mare wata shutrubur atin, uwok.

22 Aria eshudok kabi douk gitahas-umori esheshih meh
huni eneshenesh douk shabirakesh shenek yopugi musik iri,
shuni buwaen iri aruruh esheshih meh
ta mare wata shumnekeh atin abrudok wabur, uwok!
Aria shopunek, eshudok douk shadukemesh um
shunek enenyenen mour iri ta mare wata shutrish atin.
Aria amudok utom douk arpes shape shakwum shaworish urubit
wit iri shopunek

ta mare wata shumnekam miyagwreh atin abrudok wabur, uwok.

23 Aria nyih lamhosih ta mare wata shutrish atin.

Aria eshudok arpes douk shakri shunaraum iri esheshih meh
shopunek ta mare shumnekeh atin.

Aria riguk arpes shape shenek bisnis abrudok wabur

aria sharao sabaibori utabor

aria shatogur debeishi nyeiguhw abom shato-umeshi.

Aria douk uwok. Aria eshudok arpes shape abrudok wabur iri

shenek anaruh subagwiruh aria shenek roh wum

ihishmorim arpes douk shape ihigos-morim nahobigos iri.

24 Aria Iruhin natik um abrudok wabur benek yoweishi inahos

^o 18:21 Enyudok barae douk nyakrium okwudok debeikwi burbuduk iri douk nyakrium
anam takweimi utom douk eshesh shape shemakwiyesh urubit wit um shaworishat um.

babo amam profet hani sabaishi Iruhin ananish arpes shagok.
 Douk namudok aria baraden abrudok wabur banasuwen.
 Aria ihishmorim arpes douk
 kupaishi shaesh shagok iri shopunek,
 baraden douk nyanak um abrudok atubur wabur banasuwen.”

**Iruhin Ananish Arpes Shanadudareh Um
 Agundok Babilon Bananukuk Um**

19 ¹Douk enyudok nyanakuk aria yemnek enen arpen nyeyagwrehi debeihi mah kabi douk sabaishi arpes shape sheneyagwreh iruhw heven iri um nyakri,

“Apak mutuk Iruhin ananin nyeigur nyuto iruhw!
 Apakin Iruhin anan atun narap matanamori mape wosik.
 Aria agundok anan dodogowin natrugun abom um douk nape abom um anan atun.

²Anan neneken um arpes iri baraden um nasuhw esheshig durdurig kwotog um douk yopug wosik abom aria adurig atug!

Aria okwudok armatok douk kwani kupaimi shenek wehrur um kwenek sabaishi arpes shape agundok atap iri shakutukuk yopihi aih aria shagipesh okwokwih yoweih aih.
 Douk namudok aria Iruhin nenek kwotumok nakri okwok yoweikwi.
 Aria shopunek, okwok kwabo eshudok arpes douk shenek ananin mour iri shagok aria douk anan douk nawanamok enyudok yoweinyi poe.
 Okwudok armatok douk shakri wobuwobren baraden um abrudok wabur Babilon.”

³Aria sabaishi shape iruhw heven iri shape shahwar debeg shakri,
 “Apak mutuk Iruhin ananin nyeigur nyuto iruhw!

Aria ogwusudok nyugwus douk sakih ehudok nyih douk hanu abrudok debeiburi wabur iri ta sukiah suto ihih nyumneh!”

⁴Aria amudok 24-poreim debeimi armam hani eshudok nubatish dodogowishi douk mishish shoresh iri shabuh shoduk ohrubus aria shenek lotu um Iruhin douk nape ananin debeinyi wagitur iri aria shahwar shakri,

“Adur atin, apak mutuk Iruhin ananin nyeigur nyuto iruhw!”

⁵Aria eik yemnek anah mah agundok enyudok debeinyi wagitur nyakus um. Aria enyudok arpen nyeyagwrehi iri nyakri,

“Ipak ihishmorim penek Iruhin ananin mour iri puni ipak nyeiguhw shatoumep iri,^p

^p 19:5 Putik futnot nyape Revelesen 11:18 iri.

puni nyeiguhw wokepari douk punogugur um Iruhin penek lotuman
aria pusuhw ananin baraan pugipeshen iri
putuk ananin nyeigur nyuto iruhw!”

**Nugaen Sipsip Ta Nyurao Enyenyik Irohukwik
Aria Ta Shunek Debeguni Worigun**

⁶Aria eik yemnek enen arpen nyeyagwrehi debeihi mah kabi douk
sabaishi arpes shape sheyagwrehi um. Ahah douk kabi worub batogur
beyagwreh um aria kabi utag pogarog debeg um. Aria eik yemnek hakri,
“Apak mutuk Iruhin ananin nyeigur nyuto iruhw!
Apakin Debeini douk anan atun Dodogowini Iruhin abom.
Anan douk nape debeini um ihishmorim arpes shani
eneshenesh eshudok!

⁷Anan douk dodogowini arman abom.

Aria douk apak ta aparuh yopuruh
aria munadudareh-uman aria mutuk ananin nyeigur nyuto iruhw!
Nyumnah douk hanaki um Nugaen Sipsip nyurao enyenyik
irohukwik.⁹

Baugenyum baraan um Nugaen Sipsip enyenyik irohukwik douk
nyakrium Kraisan ananish arpesh.’

Okwok douk kwenek garibog kwape um eshesh biyesh shunaraum
um.

⁸Okwok douk shokok anah yopihi hatrugun abom iri
shigorihiwihi rupah kwohur.”

Ehudok rupeh ihih douk shakri wobuwobren baraan um ehudok yopihi
abom aih douk Iruhin ananish arpes shape shenekeh iri. ⁹Aria enyudok
ensel nyakripe nyakri, “Nyak wem enyudok baraan. Baraan enyudok.

‘Eshudok arpes douk Iruhin nahwadesh um shunaki um
agundok debeguni worigun douk shenekagun um
Nugaen Sipsip nyurao okwok iri um,
douw eshesh wosik shanadudareh.’ ”

Aria enyudok ensel wata shopunek nyakripe nyakri, “Enyudok Iruhin
ananin baraan douk adurin abom atin.”

¹⁰Aria eik yabuh yoduk ohrubus hurukatin um enyenyiruh yeriweruh
um yakri inek lotuman. Aria enyen nyakripe nyakri,

“Nyak mare nyunek lotu um eik, uwok.

Nyak nyunek lotu um Iruhin atun.

Eik yani nyak wani eshesh Kristen,

apak ihishmorim douk munek Iruhin ananin mour iri atup.

Ipak douk pasuhw enyudok baraan Jisas nakripepen pagipeshen iri.

⁹ 19:7 Putik futnot nyape Revelesen 11:18 iri.

Enyen douk enyudok atin baraeen nyohur
 amam profet amamiruh aparuh
 aria hakripesh Iruhin nakripam-enyi baraeen.”

Arman Netem Shigorihwinyi Hos Iri Anan Douk Krais

¹¹Aria ogwudok orug douk gweshiguk iruhw heven iri tukarog gwanak gweyatuk tukwotukwan aria eik yatigu enen shigorihwinyi hos nyeyotu numun heven. Aria anudok arman netem enyudok hos iri douk nanahwar namudok. Anan neyotu dodogowin atun nagipesh ananin baraeen wosik aria neyagwreh adurin atinyi baraeen iri. Aria douk anan nasuhw arpesig kwotog nenekog wosik atin. Aria anan nenek wanohw um, anan apa nagipesh ananin yopihi abom aih atin. ¹²Ananis nabes sape kabi nyih hanu jurareh iri um. Aria anan nowem um sabaigwi yopugwi hatog douk king-omi atum hogwem iri um ananig barag. Aria shopunek, enen nyeigur nyetem ananinhw yegenyihw. Kupaishi mare shudukem um baugenyum baraeen um enyudok nyeigur uwe, uwok. Anan atun nadukemen. ¹³Aria ahudok rouhi rupah anan nohur iri douk shosegruh owishibor aria owishibor atubor bakrupoh. Aria eshesh shahwaran enyudok nyeigur shakri, “Iruhin Ananin Baraeen.” ¹⁴Aria eshudok ami douk shape iruhw heven iri shenek yopihi abom shigorihwihi rupeh aria shetem esheshish shigorihwishi hwasahos aria shape shagipeshan. ¹⁵Aria anat wanohwit bainat tatograri anudok arman ananin nokwat. Aria anan ta nukwu atudok bainat um nubo sabaishi arpesig douk shape sabaigosi nahobigos iri. Aria anan ta nusuhw anam butum douk shenekam ain iri aria nupe debeini um ihishmorim arpesig. Aria anan ta nushish wainip shurkwip agudok debeigari tenk douk shenekag utabor iri. Enyudok douk shakri wobuwobren baraeen um agundok Dodogowini abom Iruhin nabo ihishmorim eshudok shabuhuk iri juwehosin abom um. ¹⁶Aria enen baraeen nyetem anudok arman ananin mib nyani ananin rupah. Enyudok baraeen douk nyakri namudok,

“Debeini um ihim-morim king aria shopunek Debeini um ihim-morim debeimi.”

¹⁷Aria eik yatigu enen ensel nyeyotuwu nyumnahin aun aria nyahwarugu debeg ogwuhudok ihiguhw-umorim armiguhw douk hwanadudareh hwanak iruhw iri nyakri, “Ipak ihiguhw-morim punakumori Iruhin nenekagun iri debeguni worigun! ¹⁸Ipak punaki puwok amudok king-omi huni amudok douk hape debeimi um amam soldia iri huni amudok dodogowimi armam amamiruh yegeshiweruh. Aria shopunek, puwok hwasahos shuni amudok douk hetem hwasahos iri, huni ihishmorim arpesig. Eshudok douk shape shakamum kupaishi shenekumesh mour meyoh iri, shuni eshudok douk shape wosik iri,

shuni ihishmorim nyeiguhw shato-umesh iri,^r shuni nyeiguhw wokeshi esheshiruh yegeshiweruh!”

¹⁹Aria eik yatik um enyudok debeinyi mahin nyani amudok agundok atapim king hani esheshim soldia shanak sheyotu atugun. Eshesh shanak sheyotu um shuni anudok arman douk netem enyudok hos iri nini ananim soldia shurpak. ²⁰Aria eshesh shasuhw enyudok debeinyi mahin nyani anudok nenek rohwmesh iri profet showeshikesh. Anudok profet douk nenek enenyenen Iruhin atun neneken iri mour agundok enyudok mahin nyape um. Riguk anudok profet douk nenek sabainyi mour kabi Iruhin atun neneken iri um aria nenek rohwmesh um eshudok arpesch douk sharao enyudok mahin enyenyin kak aria shenek lotu um enyenyir aborir iri. Aria enyudok mahin nyani anudok profet eshesh mishish wata shoresch aria showashesh shagrukuk agudok nuwag douk nyih hanuwi amudok utom douk shahwaram salfa iri hanu um. ²¹Aria anudok arman douk netem hos iri nabo enyudok mahin nyani anudok profet esheshim soldia hagok hatuh. Anan makwumam atudok bainat douk tatograri ananit nokwat iri. Douk amam hagok aria ihiguhw-umorim armiguhw hwanaki hwape hwawok amamiruh yegeshiweruh aria ogwoguh dugaruguh abom wosik atin.

Satan Nanaweshik Nape Sabaishi Um 1,000-poreish Kwarahos

20 ¹Aria wata shopunek yatigu kupainyi ensel nyakutukuk iruhw heven nyabuhi. Enyen nyasuhwi anan debeini sen nani ki um agudok nuwag douk gagor gabuhuk gani atap aria atapig um madae gubuh giyotu anabik iri uwe. ²Aria enyudok ensel nyasuwor dodog arudok debeiri yur aria nyoweshikor anudok sen um nyuweshikor rupe um 1,000-poreish kwarahos. Arudok yur douk shahwaror um seiwokiri yur iri. Aria shopunek, arar douk shahwaror um renek rohwmesh um arpesch rakri eshesh shenek yoweishi inahos atish iri o Satan. ³Aria enyudok ensel nyawashak arudok debeiri yur Satan rabuhukuk agudok nuwag douk gagor gabuhuk gani atap iri aria nyawarukuk wit dodog. Enyen nyawarukuk wit um arudok yur mare wata runak runek rohwmesh um arpesch douk shape ihigos-morim nahobigos iri. Arar ta rupe arigaha 1,000-poreish kwarahos shunak shudiguk aria ensel ta wata nyijikumar wit aria arar ta wata rutogur rupe meyoh rupe runarahaen banab meyoh nyutob.

⁴Aria eik yatigu enesh debeishi wagiturahos douk king-omi atum hapenyesh iri shakus. Aria enesh arpesch shatem eshudok wagiturahos. Eshesh douk Iruhin nekesh debeinyi big um shusuhw arpesch esheshig kwotog. Aria shopunek, yatik sabaishi arpesch douk shasuhw Iruhin

^r 19:18 Putik futnot nyape Revelesen 11:18 iri.

ananin baraen dodog shagipeshen iri esheshish mishish. Eshesh douk eshudok shakripesh baraen kupaishi um Jisas, aria horim shatupok esheshigos baragos aria shaesh shagok iri. Eshesh douk madae shurao enyudok debeinyi mahin enyenyin kak nyupe esheshish domaesh aria esheshish roguhwa aria shunek lotu um enyen nyuni enyenyir aborir iri uwe. Eshesh wata mishish shawishesh aria shakitak shani Kraish shape debeishi um eshudok 1,000-poreish kwarahos. ⁵Aria abudok nyutob eshesh shakitaki um, ahah douk sagomih nyumnah abom um shagok iri shakitaki wonugwegwiruh um. Ihishmorim shagok iri arpesh yapis madae suwishesh abudok nyutob uwe, watak. Eshesh ta eshudok 1,000-poreish kwarahos shunak shudiguk aria eshesh ta kadak yapis suwishesh aria shukitaki. ⁶Aria eshudok arpesh douk shukitaki wonugwegwiruh ahudok sagomih nyumnah iri, eshesh ta shunadudareh aria shupe Iruhin ananish yopishi abom arpesh. Aria Iruhin nunek yopishi abom um eshesh. Aria agundok um shugiguk shugok um ta mare dodogowigun um nesh shugok anah shopunek, uwok. Eshesh ta shupe kabi pris douk hape henek ofa um eneshenesh eshudok hako Iruhin nani Kraish iri um. Aria eshesh ta shuni Kraish shupe debeishi shusuhw merik um sabaishi arpesh um eshudok sabaishi 1,000-poreish kwarahos.

Satan Nemnek Debeiri Abom Eriger

⁷Douk eshudok 1,000-poreish kwarahos shunak shudiguk aria Satan ta wata jurug um shunuweshik um aria ta shijikuman wit agudok nuwag aria nutograri aduk. ⁸Anan ta nutograri um nunak nupe nunek rohwa um sabaishi arpesh douk shape ihigosmorim nahobigos douk sape ihigunum agundok atap iri. Eshesh douk shape Gok nani Magok iri. Aria Satan ta nuraesh shunak shupe atugun um shupe shurpak. Eshesh douk sabaishi abom kabi douk sabaiti arukot douk takus anagas um youg iri um. ⁹Eshesh shanak ihigunum agundok atap aria sheyotu shersharir Iruhin ananish arpesh shapeum. Eshesh douk shape abrudok wabur douk Iruhin urkum manawasham-abur abom iri. Aria nyih hagruki iruhw heven aria habuhi hanu eshudok Satan ananish soldia heyatesh. ¹⁰Aria eshesh shawashak Satan douk nape nenek rohwmesh iri nagrukuk kupaigi debeigi nuwag douk juwehosihi nyih hanuwi amudok utom douk shahwaram um salfa iri hape hanumi um. Enyudok debeinyi mahin nyani anudok nenek rohwmesh iri profet douk sharik showashesh shabuh shor agudok nuwag. Aria agundok eshesh bishatin ta shupe shunomnek debeiri eriger nyumneh weibus ihih nyumneh.

Debeiti Kwot Tatogur

¹¹Aria eik yatigu enen debeinyi shigorihwinyi wagitur king-omi atum hapenyen iri nyakus. Aria anan debeini netem enyudok wagitur. Aria

agundok atap nani iruhw heven sharuwokuk shanak shawishuk. ¹²Aria eik yatik eshudok ihishmorim shagok iri. Eshudok douk nyeiguhw shato-umesh iri^s shani nyeiguhw wokeshi sheyotu hurukatin um enyudok debeinyi wagitur nyakus um. Aria ono bumbek wanajik. Aria okwudok onok buk douk eshudok arpesch douk ta shupe wosik ihih nyumneh iri esheshish nyeiguhw shatemokwi shopunek kwanajik. Aria anudok netem enyudok debeinyi wagitur iri natik eneheneh aih hatem oudok bumbek iri douk eshudok arpesch shape shenekeh iri. Aria anan nenekumesh baraan wosik-umesh um ihishmorim eneheneh aih douk eshesh shape shenekeh iri. ¹³Aria ihishmorim shagok iri douk seiwok shagok youg aria esheshiruh yegeshiweruh horukuk youg iri wata shakutukuk youg shakitak shatowi. Aria ihishmorim shagok iri douk shagok shanak shape agundok shagok iri shanak shapeum iri wata shakitak shatowi. Eshesh shakitaki shape aria anudok netem wagitur iri nenekumesh baraan ihishmorim atin atin wosik-umesh abom um eneheneh aih iri mour eshesh shape shenekeh iri. ¹⁴Aria gok nyani agundok shagok iri shapeum nanawashak nagrukuk agudok nuwag douk nyih hape hanug iri. Agudok nuwag agag atug douk shakri nyagiguk iri gok ta arpesch shubuh aria mare shugok anah shopunek um. ¹⁵Aria ta enesh arpesch esheshish nyeiguhw madae shutem okwudok buk douk eshudok arpesch douk ta shupe ihih nyumneh iri esheshish nyeiguhw shatemok iri um, eshesh ta shunawashak shugrukuk agudok nuwag douk nyih hanug iri.

Namuburi Wabur Heven Aria Namubi Amnab

21 ¹Douk enyudok nyanakuk aria eik yatigu namuburi wabur heven bani namubi amnab shape. Barik iri wabur heven bani barik iri amnab shani youg shanak shawishuk abom aria madae enesh shupe uwe. ²Aria eik yatigu abrudok yopuburi wabur Jerusalem. Abatur douk bape iri agundok Iruhin napeum aria bakutukuk iruhw heven bape babuhi. Abrudok wabur douk shaginohwobur kabi douk onok armatok douk kwanaginohw kwenek yopihi atih rupeh aria kwape um kwuni okwokwin raminen shunaraum iri. ³Aria eik yemnek anah mah agundok enyudok debeinyi wagitur nyakus um. Aria enyudok arpen nyeyagwrehi iri nyakri debeg, “Ipak pumnek! Douk Iruhin nani arpesch shape atugun! Aria anan ta nini eshesh shupe aria eshesh ta shupe ananish atish arpesch. Aria anan ta nupe esheshin debeini Iruhin. ⁴Aria anan ta nubatikumesh abih esheshis nabes aria eshesh ta mare wata shugok atin, uwok. Aria esheshiruh aparuh ta mare wata yoweruh aria shumnek anar eriger aria shureh, uwok. Ihinyumorim enenyenen douk seiwok nyape nyatogur um arpesch iri douk nyanak nyawishuk abom.”

^s 20:12 Putik futnot nyape Revelesen 11:18 iri.

⁵Aria anudok nape enyudok debeinyi wagitur iri nakri, “Ipak pumnek! Douk eik yenek ihishmorim eneshenesh eshudok shape iruhw atap iri shatogur namushi!” Aria anan wata shopunek nakripe nakri, “Nyak nyuwem um enyudok baraen douk iganigadae nyemneken iri anap shup. Um maresh? Enyudok baraen douk adurin abom aria wosik um arpesih shumneken aria shusuhwen dodog shugipeshen.” ⁶Aria anan nakripe shopunek nakri, “Eshudok eneshenesh douk shatogur shatuh! Seiwok baugos um ihishmorim eneshenesh eshudok watak enesh shutogur shupe uwe aria eik yape. Aria kweipon shopunek ta ipe arigaha hugiguk iri nyumnah hutogur. Aria meinyi arpen abar baen iri, eik ta iken anabar abar nyubroh meyoh. Enyen mare nyutorabar, uwok. Abrudok abar douk bakih atap meyoh iri. Ababar douk ta arpesih shubroh aria shupe wosik abom ihih nyumneh iri. ⁷Aria meinyi arpen douk nyiyotu dodogowin atin nyunek wanohw nyubo yoweishi inahos shubuhuk iri, enyen ta nyugrem ihishmorim eikish yopishi eshudok eneshenesh. Aria eik ta ipe enyen nyenek lotume iri Iruhin, aria enyen ta nyupe eikin batowin. ⁸Aria eshudok douk shanogugur aria wata shatanam shenek yoweishi inahos iri, shuni eshudok douk madae shusuhw eikin baraen dodog shugipeshen iri uwe, shuni eshudok douk shenek eneshenesh yoweishi inahos iri, shuni eshudok douk shabo kupaishi arpesih shagok iri, shuni eshudok douk shenek wehrur um iri, shuni eshudok douk shenek ouruh iri, shuni eshudok douk shenek enenyenen um yoweiruhi subagwiruhi iri, shuni eshudok douk shenek lotu um eshudok douk madae adurimi god omi iri uwe, shuni eshudok douk shenek rohwmesh iri, eshesh ihishmorim ta shunak shupe agudok nuwag douk juwehosih nyih hape hanu agari. Agudok nuwag agag douk ta arpesih shubuh aria mare shugok anah shopunek um.”

Namuburi Wabur Jerusalem

⁹Aria enen ensel um eshudok 7-poreish enselahos douk shasuhw shagiguk abom iri 7-poreish yoweishi abom eshudok eneshenesh iri nyanaki aria nyakripe nyakri, “Nyak yowi aria iyabigen nugaen Sipsip enyenyik irohukwik.” ¹⁰Aria Iruhin ananin Mishin nyatogrume dodogowin atin aria agudok eik kabi douk yabo yomnis um. Aria enyudok ensel nyare wanak wato onohw debeihwi rouhwi yoduhw. Aria enyen nyeyabige abrudok Iruhin ananibur yopuburi wabur Jerusalem. Ababur douk baperi agudok Iruhin napeum aria bakutukuk iruhw heven bape babuhi. ¹¹Aria agudok douk Iruhin dodogowin abom aria natrugun abom um natrugun numun abrudok wabur. Aria ababur babuhi anabik sik kabi douk anam yopumi utom douk shatorum debeibori utabor iri mabuhi um. Aria shopunek, ababur babuhi kabi douk anam utom jasper mani wenyir shabuhi um. ¹²Aria arbudok narub douk

sharukarubi narub um abrudok debeiburi wabur iri douk debeirubi abom aria rourourubi bato gani iruhw. Aria 12-poreish duahas shape arbudok narub. Aria shopunek, 12-poreish enselahos sheyotu sheyoh um eshudok 12-poreish duahas. Aria asudok 12-poreis awirosish arpesch douk shakitaki Israel iri esheshish nyeiguhw shetem eshudok 12-poreish duahas. ¹³Aria bishatin duahas shape gani wobrehah-irub um narub douk bape batik aun nakihumori um. Aria bishatin shape shatik saut, bishatin shape shatik not, aria bishatin shape shatik aun nabuh um. ¹⁴Abrudok debeiburi waburirub narub agundok atapirub um douk betem um 12-poreibor utabor um busuwobur batao dodog iri. Aria enyudok Nugaen Sipsip enyenyim 12-poreim aposel douk riguk enyen nyograeham um hunak hukripesh Iruhin ananin baraen iri amamish nyeiguhw shatem abrudok 12-poreibor utabor.

¹⁵Aria enyudok ensel douk nyani eik weyagwreh iri nyasuhw anam butum douk shenekam gol iri um shape shasuhw wigah um eshudok eneshenesh-am iri. Enyen nyakri nyusuhw wigah um abrudok debeiburi wabur buni arbudok debeirubi narub buni eshudok duahas douk shape narub iri. ¹⁶Abrudok debeiburi wabur roubur um bani agundok debebur um douk arag atin abom. Aria enyudok ensel nyakwu enyenyim butum aria nyasuhw wigah um abrudok wabur. Aria douk enyen nyasuhw wigah aria ihiburmorim agundok roubur um bani debebur um bani agundok atap bato iruhw um douk aragam atin abom. Aria shasuhw wigah um, ababur douk rourouburi abom hurukatin um 2,200 kilomita. ¹⁷Aria enyen nyasuhw wigah um narub shopunek. Aria agundok atap bato iruhw um douk hurukatin um 144 mita. Amudok butum enyen nyasuhw wigah um arbudok narub iri douk amudokmori um douk arpesch apa shasuhw wigah um eshudok eneshenesh iri um. ¹⁸Aria arbudok narub douk shenekarub abrudok utabor atubor douk shahwarabor um jasper iri. Aria wabur ababur kanak shenekabur shakwu yopuri gol douk rabuhi aria ratrugun kabi wenyirumori. ¹⁹Atapirub um arbudok narub douk shenekarub um shunek narub um abrudok wabur iri douk shenekarub dodog. Aria shaginohwarub sabaibori sisigibor yopubori utabor douk shatorabor debeibori utabor iri.

Marik iri utom douk

makus atap um masuhw arbudok narub iri douk jasper.

Aria magiguk iri douk bluporeimi douk shahwaram um sapaia iri.

Aria biobor atum iri douk shigorihwimi douk shahwaram um aget iri,

aria nubatibor iri douk grinporeim douk shahwaram um emeral iri.

²⁰Aria anas wisi-ibor iri douk anabigim um owishiborim

aria anabigim um shagarihwim.

Amam douk shahwaram um sadonikis iri.

Aria anas wisi-ibor iri douk owishiborimi douk
shahwaram um konilian iri.

Aria namba 7-im douk akitohimi douk
shahwaram um krisolait iri,

aria namba 8-im douk sikim grinporeim douk
shahwaram um beril iri.

Aria namba 9-im douk anam sikim akitohimi douk
shahwaram um topas iri,

aria namba 10-im douk anabigim um grinporeim
aria anabigim um akitohimi iri.

Aria amam douk shahwaram um krisopres iri.

Aria namba 11-im douk anam sikim bluporeimi douk
shahwaram um haiyasin iri,

aria namba 12-im douk anam sikim owishiborimi utom
shahwaram um ametis iri.

²¹ Aria eshudok 12-poreish duahas douk shenekesh shakwu 12-poreib shigorihwibi debeibi weiyoub douk shatarub debeibori utabor iri. Aria eshudok duahas atin atin shenekesh shakwu atat atat um debeigwi weiyoubig natog douk shahwarog um pel iri. Aria ahudok debeihi yah douk hape abrudok debeiburi wabur iri douk shenekah yopiri gol aria ahah hape kabi wenyir^t um.

²² Aria eik madae itik Iruhin ananit debeiti urupat tutao abrudok wabur uwe, uwok. Um maresh? Debeini Iruhin anan douk Dodogowin abom nabo ihishmorim eshudok shabuhuk iri nani Nugaen Sipsip amam kanak hape kabi Iruhin ananit urupat um. ²³ Aria abrudok wabur mour ta mare enen um wah hutao hobur um o wabin aun wanyukehin aria nutrugun um, uwok. Um maresh? Agundok douk Iruhin dodogowin aria natrugum abom um, agagun kanak ta nunek ihigunmorim um abrudok wabur butrugun aria bogaragun. Aria shopunek, enyudok Nugaen Sipsip enyen kanak nyabuhi kabi douk lam um aria nyenekagun bogaragun abrudok wabur. ²⁴ Aria ihishmorim arpes shape sabaigosi nahobigos iri ta abrudok wabur butrugun-umesh aria eshesh ta shunatrugun aria shurahaen. Aria amam king douk hape agundok atap iri ta hurao amamibor utabor buni ihishmorim eneshenesh amamish yopishi eshudok hunak huwish abrudok wabur um hakri hutuk Iruhin ananin nyeigur nyuto iruhw. ²⁵ Aria nyumneh, abrudok waburish duahas ta shunujuk shupe namudok atin. Um maresh? Agundok weibus ta mare anabus, uwok. ²⁶ Aria ihishmorim arpes shape ihigos-morim nahobigos iri

^t 21:21 Arudok gol arar douk anar sikir. Arpes shutrur um, esheshis nabes ta sunak dukwotis sunakuk kabi shape numun urupat shenek narubumat glas iri shatik glas nabes arukwutis shatik aduk um.

ta shurao esheshibor utabor buni yopihi jah shuwish abrudok wabur um shutuk Iruhin ananin nyeigur nyuto iruhw. ²⁷Aria ihishmorim eneshenesh shabosusih iri yoweishi eshudok shuni eshudok arpesch douk shenek eneshenesh yoweishi inahos iri, shuni eshudok douk shenek abraenyih aih iri, shuni eshudok douk shenek rohwa um kupaishi iri ta mare shuwish abrudok wabur, uwok. Aria eshudok arpesch douk esheshish nyeiguhw shetem Nugaen Sipsip enyenyik buk iri eshesh atish ta shuwish abrudok wabur. Okwudok buk okwok douk eshudok arpesch douk ta shupe wosik abom ihih nyumneh iri esheshish nyeiguhw shetemokwi.

**Worubibar Abar Bani Shurkwip Peir Rowog Iri Douk Ta Arpesch
Shishoh Aria Shupe Wosik Abom Iri Ihih Nyumneh**

22 ¹Aria enyudok ensel wata shopunek nyeyabige anab debeibi worub. Abudok worub shopunek douk bogarab abom kabi douk wenyir ratrugun um. Aria arpesch shuwok abar abudok worub iri ta shupe wosik abom ihih nyumneh. Abudok worub douk batobe iri agundok enyudok debeinyi wagitur douk Iruhin nani Nugaen Sipsip hatemenyi nyakus um. ²Aria abab bau banak orokohunih um ahudok debeihi yah douk hape abrudok wabur iri. Aria enesh rowos shatao wobuwobur abudok worub. Aria eshudok arpesch douk shuwok shurkwip peir eshudok rowos iri ta shupe wosik abom ihih nyumneh. Aria shurkwip apa peir ihibmorim aub enen kwar. Aria esheshis shus ta sunek ihishmorim eneheneh arugeh henekesh iri arpesch douk shape ihigosmorim nahobigos iri shutogur yopish. ³Aria ihishmorim eneshenesh yoweishi inahos eshudok shuni arpesch douk Iruhin nakri adur iruhw abom um nakri wokumesh iri ta mare enesh shukus abrudok debeiburi wabur, uwok.

Aria Iruhin nini Nugaen Sipsip amamin debeinyi wagitur ta nyukus abrudok wabur. Aria eshudok douk shenek Iruhin ananin mour iri ta shupe shunek lotuman. ⁴Eshesh ta shutik ananig yamag aria ananin nyeigur ta nyutem esheshish domaesh. ⁵Aria agundok weibus ta mare anabus aria eshesh ta mare shuhem enesh lamhos, uwok. Aria mour ta mare enen um wah hutao um hunekagun juwehos-igun um, uwok. Um maresh? Agundok douk Debeini Iruhin natrugun abom um ta nutrugun-umesh. Aria eshudok douk shenek ananin mour iri ta shupe debeimi king-omi ihih nyumneh.

Jisas Hurukatin Um Nunaki

⁶Aria enyudok ensel nyakripe nyakri, “Enyudok ihinyumorim baraan douk nyak nyenyem okwudok buk iri douk adurin atin abom. Aria enyen douk wosik abom um ihishmorim arpesch shumneken aria shususwen dodog shugipeshen. Aria debeini, anan douk Iruhin douk apa nohur amam profet um hunak hukriפש ananin baraan iri. Anan neshopok

ananin ensel nyanaki um nyiyabig ihishmorim shenek ananin mour iri um ihishmorim eshudok eneshenesh douk hurukatin um shutogur iri.”

⁷Aria Jisas nakri, “Mnek, eik douk hurukatin um inaku itogrumep! Aria eshudok arpesh douk shugipesh Iruhin ananin baraen nyetem okwudok Buk iri douk nyakrium eshudok douk ta shutogur iri, eshesh ta shunadudareh.”

⁸Aria eik Jon, eik kanak yemnek ihinyumorim baraen aria yatik ihishmorim eshudok douk yeshem okwudok Buk iri. Aria douk yemnek enyudok baraen aria shopunek yatik eshudok ihishmorim eneshenesh iyoh aria yabuh yoduk ohrubus hurukatin um enyudok ensel douk iganigadae nyape nyeyabige ihishmorim eshudok iri enyenyiruh yeriweruh aria yakri inek lotuman. ⁹Aria enyen nyakripe nyakri, “Nyak mare nyunek lotu um eik, uwok! Eik yani nyak wani nyakim ashukenyim amam profet, mani ihishmorim arpesh douk apa shagipesh enyudok baraen douk nyetem okwudok Buk iri, apak ihishmorim douk munek atin mour iri. Douk namudok aria nyak nyunek lotu um Iruhin atun!”

¹⁰Aria enyen nyakripe nyakri, “Nyak mare nyubeshuk enyudok Iruhin ananin baraen douk nyetem okwudok buk iri, uwok. Um maresh? Abudok nyutob douk Iruhin nakri nunek eshudok douk shetem okwudok buk iri shutogurum douk banaki hurukatin. ¹¹Douk namudok aria eshudok arpesh douk shenek yoweishi inahos iri ta shupe um shunek yoweishi inahos namudok atin. Aria eshudok douk shenek eneshenesh shanabosusih abom iri yoweishi inahos iri ta shupe um shunek yoweishi inahos namudok atin. Aria eshudok arpesh douk shenek yopihi aih iri ta shupe um shunek yopihi aih namudok atin. Aria eshudok arpesh douk shape Iruhin ananish atish iri ta shupe ananish atish abom.”

¹²Aria Jisas nakri, “Mnek! Eik douk hurukatin um inaku. Aria eik ta iraougu eshudok um iko ihishmorim arpesh atin atin um iwanamesh ihishmorim eneheneh yopihi o yoweih aih eshesh riguk shape shenekeh iri. ¹³Douk seiwok baugos um ihishmorim eneshenesh eshudok madae enesh shupe uwe, aria eik yape. Aria kweipon shopunek eik ta ipe arigaha hugiguk iri nyumnah hutogur.

¹⁴Aria eshudok arpesh douk apa shanokwrup esheshih rupeh hatogur yopih iri, eshesh wosik ta shunadudareh. Um maresh? Eshesh ta shurao big um shuwok epudok shurkwip douk peir enyudok rowog douk ta shupoh aria shupe wosik abom ihih nyumneh iri. Aria shopunek, eshesh wosik ta shunak shuwish abrudok waburish duahas aria shuwish shupe numun. ¹⁵Aria eshudok douk shenek yoweih abraenyih aih iri shuni eshudok douk shenek ouruh aturuh iri, shuni eshudok douk shenek enenyenen um sabagwiruh iri, shuni eshudok douk apa shenek wehrur um iri, shuni eshudok douk shabo kupaishi shagok iri, shuni eshudok douk shenek lotu um madae adurimi god omi iri uwe, shuni ihishmorim

arpesh douk esheship urkwip panawasham um ehudok aih um shunek rohw um kupaishi arpesh um aria shagipeshesh shenekeh iri, eshesh ta mare shuwish abrudok wabur, uwok. Eshesh ta shupeik aduk.

¹⁶Aria douk eik Jisas yeshopoku enyudok eikin ensel nyanakumogu ipak aria nyakripep um enyudok enenyenen douk nyetem okwudok buk iri um ipak Iruhin ananish arpesh. Eik douk Devit ananin barhonin douk yakitaki ananip awirop iri. Aria eik douk okwudok unuk douk kwanahwar um shuduwi kwatrugun abom iri.”

¹⁷Aria Iruhin ananin Mishin nyani Nugaen Sipsip enyenyik irohukwik“ shakri, “Yowi!” Aria eshudok arpesh douk shumnek enyudok baraen iri shopunek ta shukri, “Yowi!” Aria eshudok arpesh douk abar baesh iri ta shunaki aria shuwok abrudok abar douk ta arpesh shubroh aria shupe wosik abom ihih nyumneh iri. Ababar Iruhin ta nukeshabar meyoh. Eshesh ta mare shutorabar, uwok.

Nyagiguk Iri Baraen

¹⁸Aria eik Jon yakri ikripesh enyudok dodogowinyi baraen ihishmorim arpesh douk shemnek Iruhin ananin baraen douk nyetem okwudok buk iri. Enyudok baraen douk nyakrium eneshenesh eshudok douk ta shutogur iri. Baraen enyudok. Ta enen arpen nyuwem enen kupainyi baraen shopunek um enyudok baraen douk eik yenyem nyetem okwudok buk iri um, Iruhin ta nunek yoweishi abom eshudok shutogrumen namudok. Eneshenesh yoweishi eshudok douk okwudok buk kwakriyesh iri ta shunek arpesh shumnek debeiri eriger iri, Iruhin ta wata nenekesh um enyudok arpen enenyenin yoweinyi poe aria ta shutogurum enyen atin. ¹⁹Aria shopunek, ta enen arpen nyukri nyukutukuk enen Iruhin ananin baraen douk eik yenyem nyetem okwudok buk iri um, Iruhin ta mare nukri wosik um enyen nyunak nyuwish nyunadi anep shuruwep douk peir enyudok rowog douk ta arpesh shupoh aria shupe wosik abom ihih nyumneh iri, uwok. Aria enyen ta mare nyuwish nyupe abrudok ananibur yopuburi wabur douk baraen nyetem okwudok buk iri nyakriabur iri.

²⁰Aria anudok arman douk nakripap um ihishmorim eneshenesh eshudok douk shetem okwudok buk iri nakri, “Adur atin, eik douk hurukatin um inaku!”

Adur, Debeini Jisas, nyak nyunaki!

²¹Aria eik yakri Debeini Jisas nini ipak ihishmorim Iruhin ananish arpesh pupe aria nutaurumep meyoh. Adur.

“ 22:17 Enyudok baraen um Nugaen Sipsip enyenyik irohukwik douk nyakri wobuwobren baraen um Iruhin ananish arpesh.